



ル 5  
3048  
12





門ル6  
3001  
卷12

門ル8  
2301  
卷12

門ル5  
3048  
卷12

崑新兩縣續修合志卷二十七

忠節上

孫察載之從子父臨大理評事察以朝散郎奉使金國守節不屈金人裹以油絮焚之罵不絕口而死

明

陳淮字禹治父周為新昌令改教青州卒淮持父喪歸遇盜抽矢擬之盜引去當時武健年少爭傳為盛事而淮故為諸生以文章自負每下筆滾滾不休嘉靖甲寅倭寇至淮請授甲捍東城賊梯木將登淮發弩連斃四人轉攻南門淮復斃二人城中人人自奮號為陳先鋒明

忠節上

昭和九年  
六月十八日  
購



年賊酋五十七人自上江突犯留都轉走蘇之靈巖山  
驍悍莫禦淮率家丁詣督府請自効督府壯之授藍號  
信幟督領嚴家兵爲奇兵左右衝突兵未集猝與賊遇  
淮接戰甚力莫有應者遂遇害家丁吳循文瑞來祥皆  
死之越二日得淮屍面如生後三十餘年遺生子應期  
舉於鄉瀝血上訴詔旌其門立祠祀之邑人私謚忠烈  
先生祠甫成鄰火不戒將及祠忽有風從祠門出火勢  
遂熄縣令王時熙題其堂曰靈風按文瑞來祥吳循外  
後亦死四人皆淮赴新昌  
時道中相與格鬪壯士也  
陳銑字守魯邑陳巷人勇敢饒膽畧嘉靖乙酉領武科鄉  
薦授太倉衛千戶王子倭夷犯境所過創殘銑奉檄往

勦倭爲惑人陣有蝴蝶長蛇諸名或揮以扇或運蜈蚣  
旗海螺一吹倭隊舞刀衝突官兵見之輒倉皇失措銑  
持矛躍馬奮擊之倭潰而遁明年倭又至銑益鼓勇力  
戰寇卻走乘勢力追夜馳數十里遲明兵盡矢竭而援  
不至遂遇害於白茆塘時五月十六日也年五十四後  
里人立祠陳巷以土穀神祀之祠後卽其葬衣冠處按  
志於陳淮傳註云倭寇之亂又有先  
鋒姓陳者執其名今據淞南志纂入  
鄭若臬字虞叔性耿介學問開博以諸生應名醫選官太  
醫院吏目凡大內宮眷有疾投劑卽效權貴相邀概不  
赴以是歲久不遷會有寵妃病劇召若臬治時已大  
醉內侍掖至宮禁扉卧階下及醒見上大驚視疾定方



而明旦妃愈更召入上錫以御衣若皋銜恩圖報乃  
劾嚴嵩父子專權誤國辭甚激嵩大怒矯詔廷杖七十  
下大理獄致之死以病故聞其子應霖汝楫應梅請領  
尸不發藁葬獄中

張振德字季修祖情進士福建副使振德由選貢生授四  
川興文知縣縣故九蠻地萬厯初始建土牆數尺戶不  
滿千永寧宣撫奢崇明有異志潛結奸人掠賣子女振  
德捕奸人論配之招還被掠者三百餘人崇明賄以二  
千金振德怒卻之裂其牘天啟元年方赴成都與鄉闈  
事而崇明部將樊龍殺巡撫徐可求副使駱日升李繼  
春等重慶知府章文炳巴縣知縣段高選皆抗節賊遂

據重慶時振德兼署長寧去賊稍遠從者欲走長寧振  
德曰守興文正也疾趨入城長寧主簿徐大禮與振德  
善以騎來迎振德卻之督鄉兵與戰不敵退集居民城  
守會大風雨賊毀土城入振德命妻錢及二女持一劍  
坐後堂曰若輩死此吾死前堂乃取二印繫肘後北向  
拜曰臣奉職無狀不能殺賊惟一死明志妻女先伏劍  
死乃命家人舉火火熾自到一門死者十二人賊至火  
所見振德面如生左手繫印右手握刀忿怒如赴敵狀  
皆駭愕羅拜而去事聞賜祭葬贈光祿卿諡烈愍敕有  
司建祠世蔭錦衣千戶明史振德父應忠字茂良十四補  
諸生治詩尤精左氏春秋性和厚有詭言侵賦橫索數



十金勉與之既而其人敗造門謝過應忠視之如初或叩其故則曰彼多無禮行自悔矣我之不較今猶昔也振德八歲時自課求忠臣於孝子論長補諸生試輒高等萬歷丙辰任興文其地與苗酋雜處振德請兩臺復弓手舊額免抽協防堡兵嚴諸酋出入禁稔知土疏衍易生物而民習惰窳米穀外不治他種振德教令取麥菽黍稷及他菜茹雜植之期年有成山壤宜杉楠野外密如灌莽並課民使條達所在成林俗好拳勇以正且相撲死勿較振德繩以法其風少息上游奇其治行檄署宜賓長寧兩邑愛戴如興文振德居官條白利害下筆滾滾皆成文章性耽文史雖簿書堆案不撤卷軸當

就義時或勸其妻錢氏去錢堅謝不出振德曰如此吾復何憾書遺命付次子緄俾逸去叛生唐華以賊至慰曰無恐振德叱曰丈夫從容就義何恐既死居民哭視之獨袍袖焦灼而已賊退相與藁葬郭外天壇山後歸葬邑之留暉門外

王燾字濬仲少孤貧九歲爲人後族人有謀其產者燾悉舉以讓之迎養嗣祖母及母惟謹萬歷末舉於鄉由教諭歷隨州知州州經羣盜焚掠戶不滿千燾訓民兵繕守具土寇李良喬爲亂殲滅之崇禎十年正月流賊奄至且守且戰擊斬三百餘人賊攻益力相持二十餘日天大風雪守者多散燾知必敗入署整冠帶自經賊焚



其署火獨不及燾死所屍直立不仆賊望見駭走已覓州印得之燾所立尺土下事聞贈太常少卿福王時諡烈愍建雙忠祠與同邑蔡懋德並祀明史燾為雲南布政秩元孫舉萬歷戊午鄉薦乙丑選海門教諭其地贄儀分九等燾至謝革之有成生者無行懼黜夜餽金燾怒叱去卒論如法諸生李存性試高等應食餼貧不能給諸費燾代為經理得補缺存性是年即膺選拔海門人無不頌之丁本生母憂服闋補儀真清操益著事邑紳陳廷策為師廷策故以廉介聞海內者邑令墨絕弗與通以百金葺學宮亦卻之陞知解州持祖母服歸丙子補隨州隨為流寇出沒地人咸憂之燾曰臣子敢擇地

而蹈乎不數月而劇寇老回回張獻忠至遂死之國

朝乾隆四十一年追諡節愍按燾死難後子錫中具疏請卹輔臣薛國觀持不許

至甲申乃得贈官賜諡

馬天騏字神逸玉麟第六子由國子生任商城縣丞署縣事崇禎十四年流賊羅汝材陷商城天騏死之兄天驥

字季襄萬歷壬子舉人官湖廣承天府推官甫里志作邳州學正

乙酉後一家十口至廣西去不返按前志天驥奉印綬自縊死天驥於桂王時為戶兵二部尚書賜劍守廣西季子錫祉贄南寧云云皆據馬氏家乘攷明史及徐秉義忠烈紀實葉奕苞志稿各紀傳俱不載茲但據董志所載存之以備考

莊子固字憲伯年十三殺人亡命後從軍有功積官至宣

府參將嘗從山西總兵許定國救開封軍半道謀歸定



國獲罪子固輯餘眾得免議後史可法出鎮用為副總兵俾興屯於徐州歸德間子固募壯士七百人以赤心報國為號聞揚州被圍率眾馳救三日而至城將破欲擁可法出城遇 大兵格鬪死

明史作遼東人忠烈紀實南疆逸史俱云崑人

歸昭字爾德有光曾孫昌世長子史可法開府揚州昭與

長洲盧涇材等皆為禮賢館士 大兵薄揚州昭分守

南門城破死之

忠烈紀實盧涇材字渭生長洲人原志作盧渭誤

弟繼登字爾

復崇禎癸酉舉人長興教諭攝縣事城破不屈死

顧天敘字禮初允元子萬歷戊子領鄉薦授鉛山知縣時礦使方張羣盜假其威縱暴山谷天敘擒四十餘人置之法其俗嫁女費不貲貧者多不舉為之正婚姻禮自

是育女皆生憂歸服闋補元城元城多鹽梟倚潞藩張其勢天敘嚴市禁私販遂絕魏地僧多不法郡守欲盡逐之大譁天敘以僧與編戶等立保甲連坐法僧遂不得為奸調嘉魚縣以子錫疇貴自免歸結廬鄧尉山先塋之側構得閒亭又作半九軒以自勵足不入城市者垂三十年生平所許金石交如王安鼎死孝歸子慕死介張振德死忠言及輒掩泣及兩都淪亡趣子赴閩絕粒七日死時年八十有一

顧咸建字漢石崇禎十六年進士授錢塘知縣甫之官聞京師陷人情洶洶咸建戢奸宄嚴警備巡按御史彭遇颯以貪殘激變賴咸建調護事寧而民免株連及南都



貴州通志卷二十一  
失守鎮江守將鄭彩等率衆還閩緣道劫掠咸建出私財迎犒乃斂威去亡何馬士英等擁兵至頤之大將方國安兵亦至咸建謀於上官先期遣使行賂兵乃不入城四鄉多被淫掠城中得無擾時監司及郡縣長吏悉逋竄咸建散遣妻子獨守官不去潞王既降咸建不至尋被執死之明史咸建爲咸正之弟與季弟咸受皆以文名吳下咸建婿於郡孝廉張世偉故與文震孟姚希孟周順昌朱陛宣善諸人皆折輩行與咸建交天啟末魏忠賢殺順昌咸建以女妻順昌子茂萼莅任錢塘時連歲大稔米價騰湧民削樹皮揀野菜爲食而三餉疊加催科愈急長吏以解額爲殿最里甲往往雉經倉

門咸建分兩稅爲十限令同甲自相曉譬不以官符追攝集父老告之曰寇患若此朝廷師旅四出征餉非得已也爾曹受列聖深仁獨不思急公分上憂而煩我遣胥隸乎民歎曰明府愛我我何敢以逋課負明府輸將填溢無後期者其他如修學宮清漕折大旱則禱雨立應獄災則再拜反風凡施德於民者甚多乙酉五月閣部馬士英奉太后至杭請潞王監國潞王懼不允從巡撫張秉貞計輸款我朝六月十三日大兵至士英潛渡江去潞王令咸建迎犒百姓隨而譟者數萬惟恐失顧知縣還至布政司堂上繳印綬出自沈於河百姓救之夜半縋咸建出城擁入舟北行大帥遣騎追及於



吳江還至杭州欲官之抗辭不屈閏六月一日詣督府  
百姓填塞轅門爲咸建請命咸建求死甚力遂殺於清  
忠坊年五十二死之日百姓各持楮幣一束就鼓樓下  
焚之煙焰燭天竟夜不息盛夏懸首城樓不集一蠅咸  
受字幼疏天啟甲子舉人崑山城破與從孫貢生晉瓚  
俱死於兵咸建於 國朝乾隆四十一年追諡忠節按曹

夢元殉難錄  
以下俱死任

夏萬亨字元禮起家舉人官至江西布政使南都既覆  
大兵下江西巡撫曠昭棄南昌遁走列城望風潰萬亨  
乃與分巡建昌副使王養正起兵拒守越三日有客兵  
內應城卽破萬亨等被執械至南昌與養正同死妻顧

子婦陸及一孫一孫女先赴井死僕婢死者復十餘人

明萬亨爲太常卿景七世孫祖有璠父世文萬亨少有  
德器由萬厯戊午鄉薦授婺源教諭遷西平知縣時河  
南郡邑所在被寇萬亨築城治隄練兵保甲修備甚嚴  
居三年改知夏邑夏邑地小民疲不可以用兵賊嘗頓  
兵城下萬亨開門出解諭之而去總兵劉超叛於永城  
督師丁啟睿率河南軍討之諸道援者且十餘萬軍資  
器械不缺於供萬亨力也超擒上命萬亨行勸農副使  
事仍治夏邑福王立使迎太后於河南擢江西布政使  
言者以爲驟改僉事分巡南瑞道初至給兵餉贏十之  
一故事主給者有之萬亨曰此何時而侵兵餉耶召諸



軍盡與之保寧王避寇南昌縱奴豪橫爲民害萬亨執而笞之府中人皆持白梃作難百姓震動羣趨王所將焚門入撫臣不能禁萬亨諡之始定視事三月陞按察使署布政司事乙酉夏萬亨奉其母至撫州屬於門生聞南昌失守乃入建昌奉益王監國旣被執大帥金聲桓以萬亨得民心欲用以撫定江西萬亨書絕命詞見志知府王域推官劉允浩暨施以畧魯忠省皆死之傳首江西棄屍城下武昌人收葬之於沌砦河題曰六君子之墓 國朝乾隆四十一年追諡烈愍曾孫時和字佩弦登康熙丁酉魁薦時和孫虎臣字雄萬曾孫之璜字纘庭俱諸生之璜工詩文天才藻逸未及婚娶而歿

士林惜之

陳用極初名用勛字子相又字名仲時曾孫父期楨字繩伯邑增生生平篤志於學課幼弟其柱甚嚴其柱旣貴猶規督不少假借用極其仲子也兄用義字子欽諸生績學能文死乙酉之難用極少以氣節自矜中年折節讀書補長洲諸生嘗遊楚蜀歷燕趙周行塞上所至交其賢士大夫甲申五月福王立以尙書顧錫疇保舉至南都時議遣使通好 本朝人人畏避用極慨然請行授兵部司務兼參謀從侍郎左懋第北行十一月遷職方主事旣至館鴻臚寺閱一月傳放南使比至滄州復飛騎追還幕中士多引去用極曰見危避難非夫也懋



第歎曰死生之際人之所難君獨易之耶遂同被拘太醫院相與講明易理乙酉閏六月十五日攝政王遣兵勒使人薙髮懋第不從又杖殺髡髮之中軍艾大選事聞逮下刑部十九日執見攝政王懋第用極俱南向坐墀下勸之降不屈王問用極曰爾何人亦不跪用極曰我天朝兵部豈肯跪王命批其頰用極嚙血呼曰士可殺不可辱遂與懋第及遊擊王一斌都司張良佐王廷佐原志作廷翰顧志作廷輔皆誤茲据咸默死節實錄更正守備劉統俱見殺臨刑大風忽起市棚捲入雲際觀者爲之流涕罷市門人山陽咸默與用極甥同邑徐元敷購用極屍焚之負骨歸國朝乾隆四十一年追諡忠節次子雄畧字易思一

字亦史康熙庚戌武科進士廣東撫標守備工詩善書用義子心字萬悅幼好學乙酉後絕意進取善繪事求者接踵卒年八十

胡甲桂字秋卿崇禎十二年以鄉試副榜貢入國學授南昌通判遷永州同知以道梗改廣信至則南昌袁州吉安俱失廣信止疲卒干人士民多竄徙會黃道周以募兵至相與議城守已而道周敗沒勢益孤甲桂效死不去城破被執諭降不從幽別室自經死明史甲桂先世本歙人六世祖祥始居崑山甲桂幼與顧錫疇同塾年十七邑令樊玉衡見其文深器之尋以諸生授徒論說書義多闡發及門率獲雋去任南昌時兩臺稔其才委署



他篆又攝守事甲桂調措兵食竭力捍禦城得全丙戌四月金聲桓督兵攻廣信既陷甲桂拔佩刀自刎猝被兵掣去既乃就縊卒年六十四先是崑山城陷甲桂弟季桂被執鞭數百不屈與甲桂子泓時從子潤時天彥皆被難一夕甲桂假寐譙樓中夢泓時血流遍體前告曰兒死矣詰朝語夢於婦翁朱寅屬以幼子溶時俾挈避深山中溶時得免季桂字元茂泓時字幼淵並諸生泓時資性絕人同學推畏友城守時散家財犒士約家人同殉兵入被執至安禪菴命薙髮不從遇害年二十三妻陸及子銛俱死潤時字霖汝幼慧精奕工篆刻卒年二十九天彥字龍初年甫冠與妻羅俱殉難 國朝

乾隆四十一年追諡甲桂曰節愍

顧咸正字端木鼎臣曾孫咸建兄崇禎癸酉領鄉薦授延安推官延安爲流賊發難地又連旱民多死徙咸正招流亡勸耕牧教民引水鑿池穿井作垣墾田至二萬畝民稍安緝議勦狗賊用反間計散其脅從擒其渠餘衆悉定十五年奉檄督兵勦賊股朱明才等殲之明年督師孫傳庭徵兵及餉將出關咸正上書言調兵不如練兵徵餉不如核餉出關不如守關又云出關安危係全秦全秦安危係天下宜一意選練以守爲戰傳庭以嚴旨催迫不得已出師遂敗歿是年十月闖賊入關咸正率營兵與總兵高傑同守延安甫十日傑遁走衛指揮



李鳴鳳開門降賊咸正猝不及覓死賊拘之營中百計誘降咸正服大黃洞瀉不止乃不復強起營去十七年正月咸正由間道至郡之士康山與紳士謀起義兵會太原已陷賊以偽命授山西巡按不從潛至韓城六月賊自山海關敗歸復以偽命授巡按御史咸正憤甚念賊勢已感可期恢復因堅卧不出未幾賊退紳士以咸正權知韓城方受事我朝已定鼎傳檄命爲商雒兵備道咸正復堅拒七月薙髮令下乃製一柩誓必死門人薛淵然潛匿之於牛心峽九月故總兵孫守法等擁故秦王第四子稱制五郎山中咸正爲擬令旨草檄文一時歸附者甚衆已見事不可爲而二子天遠天遴書

至知唐藩擁立閩中乃微服間道歸明年四月抵家時咸正弟咸建成受先已殉節死咸正草密疏附寄舟山黃斌卿屬轉達唐王爲邏卒所獲以告提督吳勝兆勝兆秘不發明年勝兆謀反事覺詞連松江陳子龍天遠天遴坐匿子龍與嘉定侯岐曾同殺於松江六月密疏亦發咸正被逮至江寧內院洪承疇曰汝知史可法在乎不在乎咸正曰汝知洪承疇死乎不死乎承疇慚恨遂殺之國朝乾隆四十一年追諡節愍天遠字大鴻貢生工詩文天遴字仲熊諸生並重然諾矜名節岐曾則天遴婦翁也與子龍善欲脫之因併及於難

王佐才字南陽少習兵法饒膂力就童子試督學熊廷弼



奇其貌命習武旋登萬歷癸巳武進士歷官遼左燕豫累遷至狼山副總兵年六十餘謝病家居每酒酣輒歎息言朝廷重文吏文吏素不習兵徒坐而長寇耳又偏重京職坐而索饋以賂遺之有無豐嗇定殿最悞國如此天下事可知矣乙酉五月大兵下江南傳檄至崑知縣楊永言棄官走縣丞閻茂才率紳耆入郡獻圖籍卽用爲知縣閏六月十二日茂才傳新令期以五日盡薙髮遲則死於是邑人洶洶傳聞陳墓陸家兵已克蘇城遂共執茂才殺之貢生陳大任推佐才爲帥於望日禡牙誓師忽又傳太倉浦六結城中人爲內應并賂諸丐以毒藥投道旁井中是日天晴雷震死二人其衣裏

皆火藥眾益信之搜捕不遺餘力遂至藉以報復凡三晝夜殺數百人佐才力諭乃止會永言同邑人陳宏勛率壯士百人至以宏勛爲右帥永言爲監紀仍主縣事七月初四日大兵東下宏勛率舟師迎戰大兵發火礮舟皆裂遂潰次日佐才欲出戰永言止之自率兵五百餘乘小舟西行未數里大兵至乃退入城遊擊孫志尹戰歿時大雨日暮斂兵入佐才冒雨立城上令部下發矢射將領一人騎卒二十餘人初六日大兵連發巨礮撼城礮中鐵丸重者至十餘觔中人立碎自寅至巳而城破永言遁去佐才啟城門縱數千人猶率兵巷戰矢盡力竭乃具冠帶還坐帥府遂被殺國朝



乾隆四十一年追諡烈愍以下俱死守

陳宏勛字建侯居崑之四橋素嫻韜畧善射精長槍同邑顧錫疇薦其才為憲標參謀募練鄉勇洎崑邑城守偕舊令楊永言以壯士百人入城捍衛眾推為右帥大兵至率舟師迎戰敗還忽腕疽發不能戰城破死之

朱集璜字以發崑山貢生學行為鄉里所推教授弟子數百人南京既亡崑山議拒守而縣丞閻茂才已迎降縣人其執殺茂才以閏六月望推舊將王佐才為帥集璜及周室瑜陶琰陳大任等共舉兵參將陳宏勛前知縣楊永言率壯士百人為助大清兵至宏勛率舟師迎戰敗還遊擊孫志尹戰歿城陷永言遁去佐才縱民出

走而已被殺集璜投東禪寺後河死門人孫道民張謙同日死室瑜琰大任亦死之室瑜子朝鑛大任子思翰皆同死時以守禦死者蘇達道莊萬程陸世鏗陸雲將歸之甲周復培陸彥冲代父死者沈徵憲朱國軾救母死者徐浴自盡者徐澂王在中吳行貞明史按本傳同時死事諸人俱別集璜為贈侍郎夏五世孫沂州判官彬元孫父家佐字築巖事母夏至孝將死語集璜曰善事祖母不則死我矣集璜性固孝奉養二十年如一日夏年八十餘卒族人議為後以集璜尚應舉以其弟嗣伯父之天者為大宗集璜泣不應不忍以進取故亂禮卒持三年服少以文名小試輒冠軍以恩貢首選入太學尋告歸同



里葉奕荃方恆宏儒葛芝諸永明柴永清輩十餘人舉浙東劉宗周證人社推集璜爲長凡風義之事一無避讓尤留心世務先是嘉定崇明二縣不轉漕崇禎中以軍興乏餉令崑山太倉長洲吳縣代輸而二邑償其直崑山輸粟萬二千四百餘石直不能盡償民大困集璜致書同郡縉紳曰二邑之不轉漕非倖也已輸直正稅矣今以額外增之民安得不病郡守爲白其事於上官免四州縣之累而二邑卒亦不轉漕邑東南有夏駕河又東南爲雞鳴塘並承太湖吳淞之委自尙書夏原吉都御史海瑞相繼疏濬後海潮壅沙積久漸爲平陸邑往往病水邑令楊永言請於巡撫祁彪佳延集璜關濬

之集璜舉張謙孫道民共事循行河源計道里分爲四則凡開四千九百八十餘丈六閱月而工竣有紀任紀勢紀工紀食紀時紀人紀成紀勸紀懼紀績諸篇又以不逞之民遠近竊發乃告永言行保甲令盜無所容乙酉六月邑人起兵集璜與永言畫戰守具及事急預遣妻子去僅留一僕七月六日大兵奄至并遣僕出城書絕命詞於衣帶間曰可質祖宗可對天地生無自欺死復何愧門人道民等不屈死者五十餘人集璜性和易然非其義一豪不取其學以誠爲主嘗曰事必行其心之所安苟自反稍疚雖萬鍾卿相弗可濡也學者私謚節孝先生子用純見儒林傳



陶琰字圭穉世居雞鳴塘漢陽經歷楷之子九歲喪父弱冠補諸生與妹婿朱集璜朝夕砥礪嘗歎有明三百年以聖賢學問語爲世人梯榮弋貴之具不欲詭隨取富貴已從蔡懋德遊學益進嘗北抵燕南遊浙西至楚又航海而南所至有紀述性孝友終母喪蔬食自後遂不茹葷異母弟產廢割田與之邑令萬曰吉重其行嘗造訪村廬乙酉之變大兵臨城募鄉勇三百人赴援至中途知城已潰乃歸日方晡集璜之僕喘而至琰問曰若主何在僕曰強之出不許今猶在城也琰曰以發死矣是晚家人進酒飲數觥就寢明發視之已縊死裙間書字生爲明人死爲明鬼門人葉方藹輩私謚仁孝先

生與朱集璜同祠山南僧舍方殉節時琰與集璜同厝棺於琰之祖墓時人爲之語曰朱斷斷陶植植生同年死同日生同學死同域琰子甄自有傳

孫志尹字咸一其先嘉定人父避役徙居崑山志尹少善射亦精醫能療奇疾遊京師入武場中式得京營遊擊銜以歸乙酉起兵衆推王佐才爲帥志尹守西門七月五日大兵薄城邑令楊永言率民兵出戰志尹執殳而前出城至西倉橋永言兵先遁志尹發二矢殪二人突遇伏兵傷胸猶自拔其鏃復中二矢乃墜馬死越十三日得遺骸於安禪菴後肢體不腐面色猶未變也

國朝乾隆四十一年追謚烈愍同時高國柱以百夫長



守城城破後猶執受不走被兵死之

按曹夢元殉難錄隨志尹將陣者若

千人其可攷姓氏二十二人唐曰都陸臨章俞銅匠張

采山宋木套平大沈養先姚巡捕蔣銅杓孫應元李仍

山陳烈朱士林徐文魁高爵俞煥程

潘夫顧約周長姚福汪侍溪僧修已

陳大任字天中允升曾孫祖如屏父衷悃並諸生大任少

入邑庠福王時選貢崑民既殺閻茂才議城守大任謀

迎王佐才為帥以已所居為帥府身自裹甲署行伍修

器械斬間諜者首懸城東門士氣倍奮駐蘇大帥聞之

以為崑城不可輕犯乃悉眾而至及城陷大任既出復

入曰同起事而吾倖免非夫也謂妻張氏子思翰曰吾

百計死忠義今幸獲死所整衣冠偕妻子安坐受刃

年二十八弟大化字神令掌造礮藥火箭兵至有曇華

亭僧引之藏匿日兄死矣我可生乎亦被執遇害季弟  
學洙自有傳

周室瑜字服堅御史元暉孫天啟丁卯舉於鄉選蜀之大

昌令道梗改儀封 大兵徇汴河南北望風迎降遂棄

官歸乙酉七月室瑜守東關與子朝鑛執戈司餉總母

出城以死自誓及城破率家人操刃守宅兵入輒殲之

朝鑛亦斫傷數人既而鐵騎四圍登屋發矢如雨父子

同遇害 國朝乾隆四十一年追諡節愍朝鑛字若金

邑諸生有文名 按殉難錄周僕從主格鬪被殺姓氏可

攷者二十二人阿辰夏壽夏八夏連俞

元俞四徐成徐成妻王大周順劉用張龍夏忠董祥

楊仲顧元周乾陶魁徐元余佃周長生及長生子

蘇達道字備倫家東南門外以磨腐造酒為生公直不涉



市道子賦才業儒早死七月六日 大兵登陣達道年七十餘猶握巨磚大呼奮擊死之視其手足胸臂皆書備倫字蓋其素志捐生云

莊士翔字萬程嘉定庠生襲吳淞千戶 大兵以乙酉五

月入蘇州即遣兵據吳淞士翔同弟士翀奉母朱舉家詣崑而崑人已起兵士翔兄弟登陣守禦晝夜弗懈城

破猶巷戰並遇害又莊華福建人居崑城為傾銀匠初

六日執械守城被殺按玉峯完節錄士翔之先有傳二

襲世職傳至士翔父某字子猶以總督熊延弼薦官副

將甲申變後赴浙魯王擢授大將軍以丙戌五月死難

娶於朱為宗伯隆禧孫女士翀字九霄乙酉七月與庶弟小虎子蘭等一家俱死

謝復元字震生少補諸生受餼遊大學為宗伯顧錫疇所

知生平忠孝自勵不怵勢利七月五日 大兵薄城下

發巨礮撼城復元挽強弓視渡濠者射殺二人次日城

破歸家素酒飲數爵遇兵且罵且格數騎突至併力砍

之死庭下一門殉難者十餘人其僕張溪與遺孤安世

收骨葬之從弟復先字子野諸生讀書孝友城將破其

父猶與其弟奕復先急負其父出遇兵俱死之

陸世鏜字進之自陳墓卜居城中少善屬文長遊太學乙

酉六月從兄世鏞倡義於陳湖邀與共事謝弗往既而

邑人起兵世鏜首先輸餉世鏞欲以義旅五百助守事

未就而城陷世鏜死之年四十一

王熠慶甫里志字鳳翔世居戈溪祖都請於縣蠲其鄉田



賦之痲瘠者數百畝里人德之熠慶性孝友慷慨好義  
明季道殫相枕日持錢買糠覈作餅食飢者崑山議城  
守衆推爲陣長歎曰一木豈能支然義不可辭城潰力  
鬪死太倉陳瑚誌其墓曰義士

陸彥冲字浩然一字國欽邑增生性忼爽豪宕能詩文嘗  
從王燾於隨州燾死節彥冲解衣殮之扶柩歸彥冲敦  
孝行居喪一循古禮絕酒肉遠房闔嘗捐已產葬祖父  
以下七棺不求助於伯叔兄弟又養其叔終身乙酉七  
月大兵至彥冲掩戶坐次日黎明索水浴戎衣挺槍  
出城潰曰吾父母墓近願死於墓未至遇兵索金彥冲  
叱之被縛罵益厲遂遇害子臨章有膂力兵至持械出

西城發火矢連殪二騎力戰死

戈化雍字均一又字志勤幼廢學走外郡營什一以供父  
母歿後遇節忌則陳設如生時清晨必焚香下拜一日  
不廢友愛其弟無爾我隔閡大兵渡江慟哭於靈几  
前未幾起義朝夕奔走積勞成疾城陷遂被害又諸生  
王徽字叔則子存善從子存哲俱被殺王君甫之子貴  
郎攜妻拜父母從容赴井死君甫亦被殺

陳邦策字匡侯淮孫諸生從王佐才守城城破哭於忠烈  
祠遇兵不屈死子女被擄至太倉兄無譽贖歸撫養座  
生恬字无競宗杰字无偽俱淮從曾孫城破兵見身上  
裹紙甲俱被殺



王獻曾字黍仲執禮曾孫郡庠生性耿介好學嘗手註五經城將破家人欲逸出叱之歸兵至整衣冠赴水死子雲鳳避稻田得免雲鳳字成博國朝康熙丙戌成進士官中書

徐開晉字晉侯一字孟實刑部主事申五世孫工傳神能作丈六大士及關壯繆像筆法精到名擅一時岸偉有膂力乙酉秋挺刃守禦城破死之年四十八子球亦死吳其沈字同初嘉定籍諸生下筆千言立就試輒高等每言及君親之際侃侃不渝北京之變作大行帝后二誄見稱於時與里中顧炎武歸莊相友善守城不屈死

徐開宏字孟博應聘長孫崇禎己卯副榜大兵薄麗澤

門去開宏家尤近飛礮千萬煙火瀾漫開宏坐堂皇飭家人毋得避遠者鞭之次日城破兵入求金不答從容就縛而死年四十三子履恂履恪履慥執節不屈皆死之惟季子履悅及履洵子世源早避得免

沈崗字儼若參政祥六世孫補宜與籍諸生乙酉六月領其橐犒捍城者城破遣子以濼走免與妻及二女先後投井死先是崗兄垠避兵城西村崗昇以五百金垠善藏之後謂以濼曰幸爾資在不然無以謝若翁於地下以濼年少乃以所遺金權子母至三千餘金始授之許身字行之吏科給事中從龍曾孫兵至索金金盡被殺長子祚韋庠生遇害於李氏之堂次子府庠生祚普以



下兄弟五人或死或被俘去又沈銘岩亦遺其名舉義時司筆札城陷被害

朱日煜熙洽孫性爽直重名節善事父母治家有法乙酉六月與二子圭臣雋臣同守東城兵至不屈二子請代不許俱死之越五日家人覓得三屍顏色如生又李逸字斐石姚曦字元暉城破皆死於兵詳見藝術

何慕字孺思其先世本長興李姓祖弁山孩時適邑人何天衢依婦翁周於長興訓導任抱養之遂襲何姓以善醫名慕能世其業性簡傲嗜酒愛客 大兵臨城率里兵設衛把酒相勞城陷遇兵罵不絕口死無子一女適人亦被害又眼醫陳慕濱茹齋食淡起兵時慕濱願守

城編入行伍夜則攜杖負蒲團露坐堵次兵至與妻妾同被害

附

城中死難未詳始末諸姓氏葉潛稟貢葉廷搢朱爾服

朱仕傑朱佐朱崗朱振朱天賚朱祚泰朱路朱天錫朱

二程周元躍周室瑞周襄祚周杲周爾疑周之軾王賡

楷王應桂王祈浩弟祈澄祈喆公輔王仕傑王家制王

時芳子維王大範王永祚陳麟瑞陳明時子邦憲副貢

陳從先弟繩先陳士鏞顧纘顧繼美顧洪徽顧維顧宏

顧天成顧象之徐岐鳳徐達可子德基同孫柴是迪柴

汝璿弟汝瑛李國柱李夢徵李克俊李燦李景平李胤

嘉子衍詒李天士蔡復襄子易芹蔡祚泰蔡方銘許國



玉許廉善許鼎燧許世璟姚雯卿梁涪錢載錢時用俞

賓俞汝葭趙元龍沈珩沈應祥吳光玉張欽止張一宿

張萌陸訥馬錫嘏楊元熙曹景元夏友良戴襄鄭之祁

范能述孫泰衡並守城死於兵又僧十三人一燈水燄

問住無私法雨實相道安應菴長慶徹生寶華止初盡

心亦守城殉難據曹夢元乙酉殉難錄

沈徵憲字章甫嘉定籍諸生宮鼎革時預為避兵地父宏

先憚於遷徙弗從徵憲送母錢於西郊而身侍父兵至

揮刃向宏先徵憲急前抱持曰吾父也乞殺吾以代遂

舍父而殺徵憲初徵憲未舉子置一妾廉知以訟窘故

鬻女亟還其女且與以金後得子名曰豐同時周鑑封

父謙培字牧之鑑封讀書穎敏年十六子身隨父乞代

死兵執之以激烈見殺又俞元初隨父世榮避僻所父

被擒趨出求免被殺以下俱死孝

張崑字玉崖崇禎己卯舉人立環子沈靜好讀書乙酉夏

聞父在揚州城破被殺與弟崑急馳往至京口兵阻不

得渡痛哭返城守時崑泣請母諸避城外母以哭父成

疾堅不肯避崑乃遣妻孥出城而身侍母城陷崑扶母

急趨東門母謂崑曰吾力盡矣當赴河死崑負母出城

後至者相擠蹴母子俱死城下幼弟峴字漢隱十歲能

屬文母命出避已復入城遇兵投井死年十六同時遇

難死孝者歸之甲周虞璇周煥若徐洛錢天圻天圻子



整祐周此聘陸雲將朱國軾柴士蘭何日起何道行祝  
侗朱順蔡朱曇守顧亥伯諸人之甲字元卿邑諸生城  
破奉母避祖坐叢葦中母恐失子婦潛出覓之遇兵加  
刃之甲聞號叫聲躍出抱母跪請不得操戈力鬪連被  
數槍死妻徐枕尸哭兵逼之投井死虞璇字在星諸生  
城破奉母朱出走至尙書里河干兵加刃於母虞璇疾  
呼大罵被殺母投井死老婢許抱璇二歲女偕投水中  
猶呼主母不置從弟煥若字雲燦家甫里八月兵至侍  
母病不去亦遇害洺字仲繩城破時兄澂已死洺負母  
夏走避遇兵於通闡橋跪請殺已勿傷八旬老母兵索  
金不得揮刀斷其左臂臂已絕右手猶挽母大呼勿殺

吾母仆而死夏匍匐至夜半少子涑匿之他所得免天  
圻字元卿早孤事母四十餘年以孝稱城未破天圻奉  
母出城復以母命入遂遇害子整祐字偉孟亦先奉其  
母出城念父在城內倉皇奔入不忍離及天圻遇兵整  
祐抱持求代兵先殺整祐天圻至暮始絕時天圻母年  
八十又一年卒此聘字枚求昌舅氏丁姓入鄉校城將  
陷此聘奉父岳岱匿馬鞍山巖洞中偶出遇兵此聘聞  
聲出抱父呼曰願以身代遂皆遇害嗣子錫字上蓮崇  
禎壬午舉人與兄京字武錫並以文名預守圍城皆死  
之雲將字昌之素負豪氣遊邑庠有聲城陷挈妻孥走  
兵勢盛不能出乃歸匿僻處父爲兵所逼挺身出鬪遇



忠義兩縣續修志 卷二十一  
害妻孫見夫被執投井死國軾字開伯庠生居學宮旁  
兵至執其父應鯉索金一再至已罄兵揮刃砍應鯉右  
臂國軾抱持而哭求代不得應鯉負重傷匍匐赴河濱  
國軾抱父同溺死士蘭字九滋父墀江浦訓導城破被  
獲索鏹無以應遂加刃士蘭大呼請代并遇害墀弟允  
祈字開殷廩生爲兵所執二子亦爭先求代俱遇害日  
起弱冠能文城將陷父命引其婦出城日起泣曰父老  
母病安敢偷生卒不去被殺道行少孤以賈爲業善事  
母城將陷或勸其母子出城母不可道行不忍離兵至  
母避脫道行下井死偶抱父求代被殺順葵救母被殺  
仍殺其母曇守年方垂髻父瞽母老不忍離被害亥伯

同弟衛母免弟逸亥伯被刃死

金必達字伯昌甫里人父駿聲邑諸生順治乙酉秋駿聲  
違薙髮令被執將就刃必達泣請代父死不允甘以身  
殉父子俱不免必達時年二十七

呂思望字章之新塘涇人本姓曹邑諸生性至孝嘗館徐  
開禧家值歲饑斗米千錢家不能給饘粥館餐至輒垂  
涕不忍食一夕夢至富春橋真武殿神語之曰君有孝  
行遺君金少許在殿隅可佐擔石覺而思之以神貺養  
親尙非不義姑往卜杯琰琰躍至墻角拾之見有物若  
鐵持以示人則宋時白金也重十四兩有湖州賈客以  
兼金倍易之曰我將以此勸孝舅氏顧咸建作孝金述



乙酉七月城陷時短兵接鬪力盡而死朱用純為之傳  
桂琳字孟華歲貢生能詩工畫子一枝字林先乙酉兵至  
琳呼兒速去我分當死此一枝跪泣曰父在圍城中兒  
將安往遂并及難同時諸生王維翰城破與子俱被執  
顧一女曰等死耳宣忠義節孝語畢死琳元孫諸生  
王翺事後母以孝稱

朱國輔字左車一字匡叔隆禧曾孫應麟子萬厯乙卯舉  
人任宜興教諭時邑紳周延儒方秉政國輔與其黨忤  
學使者甘學濶劾之除邊職補保寧府檢校奉檄權知  
潼川州事秦寇至國輔率兵馘其魁抓地虎七條龍等  
遂解去以裁革幕員還里補福州檢校攝永福福清二

縣篆轉河東鹽運司經歷遷河北屯田推官福王立遷

開封推官奉檄之南都趣解火藥乞假歸葬甫畢而

大兵已至城破遊騎索金國輔曰我是大明廉吏安所

得金惟求速死而已遂被殺於半山橋側子諶字令蓉

諸生與兄湛字心水俱工詩文痛父及生母蕭死難事

嫡母徐益孝謹母喪抑鬱死諶曾孫元載字仲升敦行

嗜學文宗蘇氏詩近香山晚倣張大復人物傳排纂續

輯未及成編病卒

以下俱死義

孫道民字霜奇十歲作飲酒詩為時所稱補諸生後絕業

利航吟詠遇溪山佳處輒賦詩少從陶琰遊為朱集璜

所賞識相見每以忠孝相勗集璜督濬夏駕河招道民



共事營度之功最多乙酉六月預守城城陷遇兵於縣  
解脅之不屈斷頸死生平所著詩甚多吞瓊集一卷則  
乙酉五月以後紀事也與道民先後共事者爲同邑張  
謙謙字履祥諸生工詩文兵至不屈死其絕命詞有十  
年未熟行軍策一死難酬養士恩之句讀者悲之

盛基字肇之好讀書談忠孝事城破被擒索金不應脅之  
跪不屈向其父經字哭曰兒不能事父母矣善自愛引  
頸就刃子錦被掠母歸及媳孫俱驚死又孫德明字紹  
峯年八十兵見其老欲舍之德明大罵遂被害

顧錫純字爾常以諸生入太學聞國變日書天地祖宗字  
城陷整衣冠赴水死又諸生顧孝開敦尙氣節兵至或  
挽之遠避孝開曰我久沾廩糈敢偷生以負義乎城破  
不屈死錫純從弟貢主循天峻次子也亦不屈死

朱維宗字新卿顯宗弟禮部儒士壯年未舉子撫顯宗四  
子且爲子已復生子暉乙酉城破維宗及弟庠生耀宗  
俱赴水死耀宗字潛卿鄉居訓蒙遇亂移家入城者且  
字與明兵至持戈登屋格鬪與暉俱死

徐澂字伯因吳行貞字履冰兩人相善也澂髮未覆額視  
當世鮮當意奇行貞文妻以妹行貞亦雅自好同室而  
居澂奉母夏以孝聞乙酉城將破具冠服列祖宗神位  
呼弟妹并諸婦羅拜曰祖宗世受國恩我兄弟幸列賢  
序城破有死而已顧其弟洛與溱曰善保我母北門可



出則出迨兵至大罵被害行貞儒冠儒服從容赴井丙戌夏里人濬井得之面目如故

戴元祚字明儒臨元兵備士傑長孫邑增生生平不妄交與惟與太倉王湛同里吳其沆徐履慎相善又從弟元禧字慧兼元旦字歌雲友愛踰於同胞乙酉七月王湛在太倉拒兵死其沆夫婦偕死履慎及弟履恒履愷俱死元祚與二從弟同時被難長子節孫被掠至南都庶子應孫流落常州俱父執鄭浴日攜之歸湛字德嚴崑庠生私謚端烈先生

王在中字君垣太倉籍庠生性坦易妻胡氏早亡無子祇一女乙酉城破在中抱所著詩文投井人莫得而知也

丁亥四月鄰人於陰雨夜見元冠白衣徘徊井上卽之不見發井得在中屍面目不改衣冠如故遂告其妻弟殮而葬之西關舊阡

茅以茵字君蘭邑諸生家甚貧事母以孝聞性嚴介每談及朝事輒悲憤慟哭所居東禪寺左破屋數椽邑相顧秉謙第在其右天啟中秉謙方里居以茵自里塾歸必過其門值深夜守柵者不肯啟以茵罵曰汝主依逆黨爲天汝輩依汝主爲天冰山旦夕休矣無庸慢拒書生也守柵奴入告其主毒捶幾斃投之河平旦鄰人見而掖歸邑中喧傳顧閣老捶殺茅秀才士譁於學環擁攝篆通判俞某趣至以茵家視其傷秉謙驅蒼頭數百人



挺而出士民疾鬪秉謙第幾毀乙酉城陷以茵冠服拜  
母曰兒向所以不死者母在故也今不能待矣兵至揮  
以刃以茵噴目叱之連被數刃而絕

韓元鎮字伯宣居邑之南崗世業醫城守時踴躍誓死嘗  
語其弟曰弟能娛親以天年終予置死生於度外矣城  
陷被殺又周云璠字魯玉少善屬文弱冠棄而就武兼  
治醫城破云璠先溺其三女一子及妻欲踰城徃省父  
母於西關外倉卒遇兵不屈被害

陸幼安千墩人薙髮令下幼安出所蓄雞豚祀其先人大  
會宗黨親戚痛飲至夜半自投橋下死又顧鐵匠甫里  
人性質直七月十二日兵強之薙髮不從被殺

周晟字叔韜濶字源初俱尙書倫曾孫晟長子灝字平初  
城陷與父俱死灝子郡庠生允熙赴水未死濶與妻俱  
躍入宅傍之東河子楨年十五亦從死族姪鎡字莘孟  
衷祚字贊俞郡庠生俱倫元孫並死於難鎡子復五移  
居度城事孀母以孝稱衷祚子尙幼不知其處胞姪之  
楨事平後奉其夫婦衣冠葬之翁浦口

潘康侯字子晉諸生工詩居邑之妙花涇甲申聞變大慟  
欲自盡母止之乃披髮佯狂行歌田野間丙戌遭母喪  
殮畢林生平著作闔戶自經死子碧字煒玉嗜學能詩  
痛父殉國難終身布素不御酒肉生子選後卽夫婦異  
室所爲詩多幽憤悲感之作晦迹邨僻以老



顧清晏字爾符泰順訓導孝宏子崇禎庚辰武進士授寶山衛守備乙酉大兵至海上清晏逆戰於黃浦身先士卒飛矢貫兩臂戰益力旋中礮歿於陣時年四十弟熊字爾策國朝順治戊戌武進士性耽文史不樂仕進嘗輯其先世自上海遷崑宗譜簡覈有體為從父炎武所稱北平孫承澤為之序

張止緝字令績荆藩長史璣之後為諸生有聲士林與妻龔俱以孝稱乙酉守城止緝募數十金將上之主者而大兵已至城破赴井不死亂兵牽出強之跪不從求金又不許大罵遂遇害兄止穆弟雋皆知名於時按止緝之本籍金陵避烟沈萬三禍徙崑山子仕聰即璣父也璣字循伯永樂六年舉人第六子克高其裔孫即止緝

張陽豫字孟和太倉人以貢授金壇訓導歷寧國教授歸愛崑山風土攜其子王桂吳儒來崑買宅於女夫戈化雍舍旁大兵圍城陽豫登陴拒守其子執黃旗麾軍城破皆死周復培字元之兵部主事光祖季子七月六日復培慟哭誓死忽鐵騎充庭奮拳與搏被刃死又嘉定籍傅咸字宜仲岷縣訓導遜曾孫知州冲次子兄弟七人以不善逢迎崑令不與優免連充北運皆賠累破家城既陷與妻子俱赴水死又吳縣庠生劉古江字生西陝西參政錫立孫乙酉五月避兵至崑依妻父葛錫璠以居七月六日一門俱投水死

上永慶字子升世蔭鎮海衛百戶讓弗就卜居馬鞍山下



怡情山水繼娶於沈纔一年 大兵下崑山謂妻曰我必死矣汝亦不可辱城陷共至山巔時同避兵者男女數十人咸勸毋死永慶笑不答散所攜人給之裂單衾縮結於樹沈先就縊視氣絕乃自縊於左時長子國光在婁東先於閏六月至崑城已閉不得入為亂民所殺幼子國化被俘逸歸按永慶之先覆姓上官世籍淮西僚有翊贊功洪武三年冬大封功臣斌已病上幸榻前見婦人抱一兒侍側上曰若子乎應封侯語未竟又一媪率一子而拜曰臣妾結髮事斌若封功臣此為嫡子上笑曰此婦實從戎數年所生子亦不可無爵因取姓兩分之長曰上仁次曰官義以齒穉俱授錦衣擬他日並封斌卒育二子宮中及靖難兵入二子不屈上不忍殺謫仁鎮海衛義武昌皆降授百戶永慶其後裔也

朱漢徵字方黯弟侃字子晉乙酉五月聞揚州破漢徵從

南京抵家時婦子咸避於鄉比歸亟呼入城曰死生命也何避為家城西城外發巨礮及庭屋因徙東城張貢生之園漢徵與妻張妾李及長子羽九次子虎三子鶴孫虬同時殉女適何生珪者同遇害侃妻任及子仁謚仁讓仁謚妻季氏並被害一門殉難者數十人漢徵與侃文行詳文苑按原志文苑傳漢徵與弟侃並死乙酉難其一門同殉姓氏未敘茲因採入

朱晟字與升幼具異姿垂髫補弟子員素重然諾乙酉夏城守念里中病者枵腹計給其糒兵臨城題壁曰我先人豈知王氏臘乎及城陷大書於壁曰四十萬人齊解甲豈無一箇是男兒遇兵擁至學宮前厲罵被殺子謚年十歲逸出痛父死哀毀成疾不三月死



葛用礪字乾伯庠生原名錄錫璣子都運使綸曾孫素負  
豪氣乙酉 大兵薄城下或勸少避用礪曰我家世受  
國恩且身列鬢序分當死敢偷生以負義乎乃悉散家  
財犒捍城者城陷被害時年三十二

附錄阿五者失其姓為諸生李枝森家僕乙酉七月六日  
枝森夫婦及女俱被害母老僅免一子方三歲越二  
日復遇兵阿五跪求曰吾主已殺乞留幼主當代死  
遂被刃至十二日夜枝森母聞叩門聲啟視見一人  
負兒歸置之地其人倏不見詢以誰抱汝來則云五  
五距阿五之死已五日矣

崑新兩縣續修合志卷二十七終

崑新兩縣續修合志卷二十八

忠節下

國朝

○楊士祥字愛林居石浦幼從軍積資至千戶康熙甲寅  
耿精忠反於閩將軍楊捷督師赴浙以士祥為隨營守  
備尋進中軍兼管糧餉時頓兵仙霞嶺下賊騎衝突兵  
皆潰士祥恐餉失乃瘞銀而識其處從者挽之去不從  
大呼擊賊遂被害後精忠敗降得所瘞餉銀事聞贈清  
遠將軍 賜祭葬蔭一子千戶

○周詩字吟樵嘉慶甲寅舉人蕙田次子國學生援例為  
縣丞需次皖省咸豐四年攝定遠縣事粵逆竄至境詩



身新兩縣續修合志 卷二十八  
率領團練兵勇出禦賊鏖戰盡晝力盡陣亡眷屬隨殉  
○武生王正芳充崑新城守營兵咸豐五年奉江蘇巡撫  
吉爾杭阿調崑新守備柏成林赴鎮江大營差遣正芳  
隸柏麾下隨之是年四月隨領隊李出兵五洲山下牛  
馬鞍邨殺賊陣亡

○候選巡檢戴大川字禹舟爲徽池營務處軍火委員咸  
豐八年四月七日在浙江麗水縣卻金館地方遇賊抵  
禦力竭陣亡大川同族慶恩任浙江孝豐縣天目山司  
巡檢賊至率勇拒敵亦力盡陣亡惟年月失攷

○汪著隨李忠武公續賓襄辦營務咸豐八年十月八日  
在三河大營殉難

咸豐庚申至同治癸亥殉難

兩邑已旌未旌均依  
殉難年月先後爲次

○王炳星原名壽仁字鏡人號半巖父廩貢生懷芳教子  
嚴炳星甫弱冠與兄諸生壽平歲貢生壽格先後補弟  
子員歲科試兄弟屢列前茅名埒一時道光丁酉拔貢  
乙未膺本省鄉薦嘉興沈少司空維鐫視學皖中聘爲  
襄校識拔多名宿儒大挑二等選授宜興教諭以母憂  
回籍咸豐庚申春粵逆東竄蘇省戒嚴炳星集邑城紳  
士團勇防堵晝夜無懈四月二十六日賊大股竄入城  
炳星厲罵被戕死長子文童晉蕃幼子泰交泰同亦並  
殉難

○方寶醕字子美以諸生入太學精時藝工詩詞南北應



棘闈試不得志閉戶絕塵俗以詩酒自娛賊竄崑城被執不屈賊知其諸生以重用誘之大罵不從賊憤砍其一臂一足寶醕曰吾不願死賊巢中匍匐歸南門外舊居逾日氣絕

○鄭日楷字殿香庠生品端行粹為同里所欽習醫道行甚遠家塾授徒門下士游庠食餼負時譽者多賊氛將逼親友咸勸移眷避於鄉日楷曰見危授命士之分也何以避為賊竄城迫之從不屈大罵被戕妻女同殉見義烈

○庠生王寶臣遇賊南門大街平橋塊大聲罵殺賊遂被害妻女並死見義烈

○庠生朱綸字子垣城陷日遇賊被執不屈賊欲砍之長子附監生晉基亟趨救父子同被害次子晉勳投水死妻隨殉詳義烈

○庠生陳埴徐寶書毛文田王鏡蓉方禮泉監生王咸慶咸一作餘汪大梓並罵賊不屈被害監生龐樹堂投河死

○候選縣丞楊攀龍庠生胡鳳翔並遇賊不屈被害從九品銜周佑宗遇賊拒鬪被害

○文章陶用儀年十五弟用禮年九歲賊竄入城隨母並女兄罵賊不屈全家殉難並見義烈

○義士戈竹山素負力與賊巷戰手刃數賊賊併力擒殺之子鍾杰隨殉母朱氏自經死並見義烈



○義耆葛世麒字甸華年七十聞寇至整肅衣冠率子敬先詣節母祠叩辭祖先賊騎突入被執不屈父子同時殉難又老匠姚靜山年六十九城陷僵臥櫬中賊入其室靜山大罵以刃自刺其喉而死昭忠錄並有傳

○義民龔左吳式善俞理中俞文英孫文錢峻蕭瑚楊振聲王瑞華湯效先湯延安湯祥趙簡堂周岐金芝堉金志道嚴靜安董少穆李海金諸銀坤沈兆明沈亦昌沈廷榮顧企南顧兆駿戴康曾孟奎陸正奎薛三寶隨母汪氏席素鵬葉大沈增泰流寓詹東山徽州人並遇賊不屈被害

○儒童王景銑義民沈福來雍士華陳豐三汪益昌汪益

珍周大呂沛顧廷奎陸二流寓徐大人品熟並遇賊不屈

○投河死王之幹投井死僧人善根投池死

○義民王晉周啟濂一作隆洪世昌並罵賊被害方外釋石

泉瑞心道傳宗並城陷日被害又蔡輝堂遇賊逼受偽

職罵賊被害

○儒童席素勳義民姚長壽周少山同妻羅氏周三大史錫眉

並自縊死方外倪乾垣法名元恩真人府贊教廳住持

太初道院亦自縊死

○義民顧煒齋煒一作惠羅俊三同姪羅大羅海並自刎死錢

耀絕食死

○義民陶梅軒趙聖章流寓楊大發徽州人李裕觀太湖人並



遇賊被焚死

○義民陳嘯明周伯宗拒賊陣亡王永嘉沈桂齋遇賊不屈被害熊鴻賓遇賊投河死以上並咸豐十年四月二十六日城陷殉難

○武生陳杏枝遇賊紅木瓜橋持械鬪擊並以火鎗斃賊無算力盡被戕武生陳桐枝陳春圃拒賊被害昭忠錄杏枝有傳

○庠生許鑾號書三張浦人賊竄張浦率團拒賊被害流寓盧春綬元和毓嵩孫讀書張浦鎮舅氏許倬家奉母

○避居管上村遇賊不屈被殺死  
○席愷字松喬選授山東陽信縣典史丁母憂回籍遇賊於燕子磯不屈被害

○倫生董彰吉字廣齋昭忠表誤作二人廩貢生光奎次子世居

萊葭浜鎮授徒為業賊至鎮彰吉母某氏年邁不肯避遂侍母於家賊知彰吉為書生執之去偏受偽職不屈殺之棄尸於水時盛暑歷三晝夜顏如生家人始斂之

○儒童汪理嘉殉難監生汪大梓之子在新北鄉莫家灣遇賊不屈將被擒理嘉同妻投水死長子益銓年七歲次子益榮年五歲見父母投水慟呼父母不應同赴水

攜手而死理嘉三子益整同治元年四月年五歲隨祖母薛氏遇賊東北鄉錢門塘薛氏殉難賊挾益整去大哭手抓賊面見血賊痛憤以刀刺殺之闔門先後殉難者七人慈詳義烈



○儒童陳士標率團拒賊中鎗投河死義民楊元王一嚴敬劉念春拒賊青洋江陣亡張大拒賊三江口陣亡安禪寺僧悟宗獨力格殺數賊被害

○義民朱錦昌張裕卿王凝王增福邢愷仁周紹昌周靜香金壽安鄭秀卿並舟直鎮人聞城陷集資練勇防禦鎮中賊掠至大直村錦昌等並拒敵陣亡寄居舟直鎮田松年田鳳年田萬年並山東黎州人亦隨陣亡沈洪良拒賊王家港陣亡

○義耆唐士傑周近思年並七十有餘周巷人聞城陷率領鄉民團練揭竿為旗制梃拒賊屢敗賊眾庚申五月三日賊統大隊四出環攻士傑近思力盡陣亡被賊轡

割圍勇陣亡可攷者王惠季方雍克復張龍楊喜杜元林杜受基沈耀環葉寶鄔三沈宗明浦彤王度十三人同時張浦趙浦新塘等處合起義團接應拒鬪其張浦陣亡可攷者蔡錫泉顧念椿汪大林虎施洪包顯堂一作李安吉許天吉管銀海李仁昌葉嘉唐永脩唐永錫楊文炳張丕成李昆玉李玉山楊文顧裕祥同子玉山顧傳香陳玉陳瑞李坤元顧幅等二十餘人其趙浦新塘陣亡可攷者馮世安黃大梯許竹思許竹淇蔣玉顧大顧二葉彌蔡文顧福瞿二鄔大章許文通李五福金二彭仙雲唐錫萬王小王五王雲祥王景華張廷錫沈芸卿陳三陳文祥倪春山俞必文朱德翁三等二十九



人又雷楚山甯波人

○義民周興賢拒賊陣亡張德源李萬榮遇賊並不屈被害徐厚福遇賊投河死

○義民吳本心同子大官吳三寶孫學明張世澤王承基方二王良基湯雍齋遇賊投河死

○義民居福成徐鏞朱洪吳還陳三顧孫三姚受正陶賡良王惠山周興辭周起雲周萬機周大魁周四邱茂宗李洪山管天佑沈名立陸茂德並罵賊不屈被害

○義民徐棟琳徐四朱光燦陳繼昌陳八先陳和潘裕章錢安齋全振南姚履包汝惠查紹張道亨張自發王壽初王金奎王四和王福唐洪九湯耀先湯榮齋金達生

周維揚杜德階閔二管金福趙榮宗夏允懷顧在明顧

小二蔡金虎陸春器流寓吳蘭亭休甯人吳威如蘇州人並

遇賊不屈被害以上並十年五月殉難

○庠生陳星瑞住元明邨被執不屈投清洋江死武生薛湧率團拒賊李區五奮力竭陣亡

○義民姚月亭率團拒賊被執不屈鬻割死陳琪陳積甫一作節甫陳大陳二姚勝先遇賊投水死楊雲龍孫茂莊六

顧大並罵賊被害流寓楊升榮甯波人官軍克復嘉定升榮往守城嗣城復陷死之以上並十年六月殉難

○彭維鏞字鑑堂崑西鄉舊澤邨布衣賊至邨邨眾紛紛遠避維鏞以父老病危侍於家賊掠其家維鏞持械抵



禦力盡被執大罵不屈被斫七八刃斷腕折項罵不絕口而死

○文童王嘉煦遇賊不屈被害義民金福元張正芳周存  
澧趙松泉趙以鄂沈永貞陸松辭贊廷席覲芳一作席  
敬王甸安並遇賊不屈被害錢進被破腹支解死沈麗  
卿自縊死

○義民馮堃即厚陳松一作松觀顧景蘭蘭一作瀾並舊澤邨  
人遇賊拒鬪死景蘭姪菊亭赴水隨殉周仲斐鄒子恆  
沈榮曾盛輔仁盛鍾英並遇賊投河死流寓陳雙福河南  
光山遇賊被戕以上並十年  
汪德裕浙江桐鄉縣丞在屠甸寺鎮率眾拒賊陣亡

○庠生徐鳳翼監生徐經緯遇賊自盡文童王祥鳳昭忠錄有  
傳顏彥彬遇賊投水死

○義士朱鍾泰龍潭村人訓蒙自給鄉里咸重之遇賊大  
罵身受十餘刃而死孫裕良華玉山同時被戕

○義民胡鍾仁遇賊投水死流寓曹大芳歙縣人遇賊不屈  
被害以上並十年  
八月殉難

○薛廷訪薛廷諳並監生五品軍功年甫冠投効京口協  
鎮鞠營中賊撲鎮江近廷訪廷諳隨鞠營進勦奮勇擊  
賊陣亡

○庠生龔承德拒賊茜墩鎮陣亡

○義民陸晉卿蓬閭鎮人賊至鎮按戶擄掠晉卿閉戶拒



○賊厲聲曰吾家清白門庭不容髮逆入賊聞恚甚積薪戶外焚之屋宇俱燼晉卿與妻詳見義烈暨長子福次子壽屍猶以次端坐不仆賊見皆驚走

○義民朱富昌子大信周家浜人遇賊洞庭山械鬪手刃數賊父子力竭被擒同遇害尹崑吳士何金甘子松並遇賊不屈被害以上並十年九月殉難

○布政司經歷銜汪洪裕庠生施安仁並遇賊不屈被害以上並十年十一月殉難

○監生從九品銜李元吉遇賊逼受偽職不屈被害  
○錢正奎字近微號慕韓金馨元孫性孝友自幼失怙家貧授徒磧磯邨以館穀奉母甘旨每解館省親不離膝

下弱冠補諸生試輒列優等餼於庠屢躋秋闈試志不墮攻舉業益精從游者日眾積餼貢成均就職訓導道光己酉邑中大水襄辦賑務不辭勞瘁董兩邑善堂事始終勤慎高祖金馨手澤散失就湮正奎出資購得銀板藏於家庚申粵匪竄崑避北鄉念魚堰邨賊掠至邨遇賊被執不屈脅以威罵不絕口被斬四刀而死

○義民張錫茂遇賊被焚死馬炳基被賊榜掠死以上並十年十月殉難

○汪國恩字湛江府學廩生客授洞庭山咸豐辛酉二月朔粵匪大隊掠洞庭執國恩令易服色不從脅以刃國恩曰死則死耳不可以賊衣污我體觸石死之賊恚甚



醢其屍時年二十四昭忠錄有傳

○義民吳茂遇賊不屈被榜掠死温三官投水死以上並

正月

○義民江慎堂夜區二畝人遇賊持械拒鬪力盡被執不

屈賊焚其屋不走死於火十一年三月

○儒童張仰夫張樹松並遇賊不屈仰夫被戕樹松投水死

○義民高茂蘭嚴振聲俞亮周大成周大仁並罵賊被害

大仁被破膛以上並十一年四月

○義士任梅亭勵學不倦講求性理諸書與楊景榮楊雲江夏春山並吳家橋人遇賊不屈同被害

○義民沈廷桂拒賊澱山湖陣亡吳和陸毛陸二查鳳翔

彭小施永成楊承宗黃安舟邵小雅陸銘齋並拒賊被

害流寓胡在明歙縣人亦遇賊鬪死

○義民陳文榮張玉山王繩祖項厚牛顧四王朝烈並遇

害罵不屈被戕

○義民詹還詹二生區五畝人又顧三倌柳玉山並遇賊

投河死以上並十一年五月

○義民張龍遇賊投水死李小犬遇賊不屈被害以上十

月

○武生張貢庭遇賊江安邨率眾持械拒鬪力盡被戕

生柏治卿遇賊不屈同妻投河死並見義烈



○義者顧秀恩年逾八旬石浦鎮農人賊至鎮秀恩罵賊被害其子育慟父死持械擊賊被擒斬首懸於大橋孫四信赴水自盡幼孫五信不願獨生指賊大罵被賊鞭扑而死曾孫大信年甫免懷亦被賊投水死同時一門殉難者五人 昭忠錄顧育有傳

○義民張繼成葛玉瑛並石浦鎮人朱熙泰天區十四畝人又吳應姚同時遇賊不屈被害柏煥洲遇賊力鬪死 以上並十一年八月殉難

○蕭濤從九品銜住北鄉黃倉涇村賊竄北鄉濤誓不見賊面自縊死文童陳其鑾罵賊被害

○義民吳質夫張士達邱福如遇賊被害秦新秦金並里

巷人亦遇賊被害朱沁齋孫桂岩遇賊同妻被害 並見義烈

王松耀馬在塘遇賊投水死 以上並十一年九月殉難

○監生許球遇賊投河死文童曹錦堂遇賊被害  
○義民張德勤徐秀玉金區二畝人德勤慷慨負氣聞人談古今忠孝輒悲感嗚咽及奸邪害正則目眦盡裂兩顴發赤擊案大叫人以是笑而侮之十一年冬青浦賊酋鄧天福徵鄉人糧偽師帥陳某者素無賴與德勤不相能程為賊搜糧甚亟德勤不應程率黨突入其家德勤叱曰爾非吾大清朝百姓耶竟敢作賊官助賊徵糧猶醜然見我程羞憤大言曰爾敢抗糧死在旦夕矣德勤怒揮拳痛毆之鄰人徐秀玉與德勤善聞之挺身



出德勤已擊程垂斃矣曰請為君除其黨遂盡斃之鄉人慮後患咎德勤曰賊再至吾屬無噍類德勤曰公等且避賊至吾自當之亦無與秀玉事秀玉曰吾亦豈畏死者越一日青浦賊果至縛德勤秀玉見其酋植立不跪命之跪則皆曰死即死耳何跪為遂絮裹其身灌油焚之珠溪城隍廟中足焦灼罵益厲及胸腹爆裂聲始絕觀者無不涕泣事採昭忠錄張徐合傳○以上十一年十二月殉難

○義民唐金生區八畝人遇賊南鄉黃浴里持械拒敵受礮死陸奉先神童涇人罵賊被戕陳紹祁胡康遇賊投河死以上同治元年正月殉難

○庠生金象煦避難稱區十二畝庠生徐晉綸避難安亭

鎮遇賊不屈並被害庠生周景曾罵賊被害

○義民張芳春黃繼良遇賊投水死以上並元年三月殉難

○廩生鍾鳴鳳庠生陸熊字慶堂同子大官並菜區二畝人遇賊

不屈投河死

○庠生陳彬堂沈守義蔡延祥職員唐淑監生孫起雲蕭

承茂武生俞春巖蔣慰祖侑生羅煥遇賊不屈並被害

候選府經歷周錦堂八品職銜曹子麟職員羅秋霞武

生胡愕侑生羅慶德羅雅緣並罵賊被害監生朱維潤

陳墓鎮人遇賊中洋鎗死

○武生包泰元賊竄東鄉葦葭橋泰元持械奮鬪擊斃數

賊力盡被擒命之跪不從大罵被賊破腹斬首懸里門



而去

○孔昭賢南鄉方巷邨人素有膂力膽略過人賊掠方巷昭賢率邨人拒鬪賊股麴集邨眾不能敵而潰昭賢獨力拒戰賊環執之識其勇誘之降因大罵曰我至聖後裔肯從爾逆賊耶賊怒積薪焚之賊退後收其屍骸僅

存焦骨一支

昭忠錄有傳

○孔啟明

昭忠表作憲章

住陸渡橋賊至啟明指賊大罵被殺妻

陳氏持械擊賊被賊執縛焚其廬投於火而死

並見義烈

○唐彥槐字茂林號竹筠居蓬閩鎮父秀章有隱德彥槐幼聰慧善讀弱冠游庠後卽膺道光辛卯鄉薦家貧秀章多病侍湯藥不離左右彥槐有三弟食指繁遵父命

析箸諸弟或儒或賈均俾得所喜行善以扶持風化爲亟務遇節烈事竭力闡揚蓬閩多詩人詠選刊蓬溪風雅集行世鎮當東西孔道商旅輻輳時有流娼博局爲風俗憂請諸當道勒碑永禁己酉水災領賑於城不及致有道殫因請分設義倉規模甫就而粵氛近逼彥槐奮身爲團練首及事不可爲伏草間輯所著闔齋詩文稿鄉評小傳祀彥子等書授其弟畊雲曰善弄之賊至則我死矣賊大至各奔散賊退覓彥槐尸不得有見者云與賊相拒傷數槍投瓦浦而死從弟彥材同時遇賊被執罵不屈被斫躍入西葛涇死

○李榮紳字貫伯原名同輻鈞載子久居崑城東塘街原



籍寶山年十二操筆爲文卽有法度游庠旋食餼咸豐  
初元積餼貢成均孫貫孫字學白以諸生入太學攷取  
膳錄同避難東鄉遇賊大罵不屈祖孫同被害榮紳年  
七十二貫孫年二十餘

○義民徐晉浦柳橋陳大張仰傳王蘊梅王嘉周勤思周  
芝山許傳許居方郊布颯並拒賊陣亡儒童俞亮明集  
團拒賊虬江邨被執大罵遂遇害義民曹芳時曹秀章  
拒賊菜區二畝力盡陣亡亢丹書阮茂林拒賊菜區四  
畝力盡陣亡

○義民戴帶張熙精遇賊不屈被害

○義民徐原仁吳通元羅品揚近香周晉項南山顧毓顧

瞻岐並罵賊被害

○義民徐瑞徐昌宗徐耀德朱金朱益元朱鴻胡以鍾俊胡  
履泰胡翼修胡鍾奇俞錫寶陳紹其陳成玉殷成孫黼  
年錢穗九錢登高曹樹文曹樹梅曹紹芳曹竹堂曹秀  
年張大張仲王文星黃懶耕湯玉樹劉鳳劉建揚劉安  
心劉福德金福金玉相項大趙明德蔣惠九沈德昌顧  
宗同子顧大陸大陸二陸釗鏞陸近書言濮大葉大流寓  
李承賢鄞縣人莫松岩山陰人遇賊不屈被害  
○儒童胡兆祥朱孚成孫黼平曹庚和胡灝並遇賊被害  
諸大觀曹志學唐毓麟周錦熙遇賊並投河死

○義民吳壽觀吳錦天陳立功喬夢園王寶賢唐夫觀周



挺雲周晉元並遇賊不屈被害張鑑遇賊絕食死以上並元年四月殉難

○義民周奎大顧三元陳愛生並陶家橋人賊眾竄鄉奎大等率團防堵揭竿為旗併力拒敵至賊勢益熾奎大力不能支被擒不屈賊破其腹斮割而死復焚其室母李氏被焚死詳見義烈三元愛生同時被擒亦罵賊不屈賊斬三元首斮割愛生棄其屍於河賊退鄉人得其首葬之面如生

○增生王邦慶庠生陳岷瞻並罵賊被害  
○武生李景初佳元明邨賊至肆掠景初素有勇力持械拒鬪力盡被執戕死

○文童周豫鄔堪龔師潞遇賊投河死

○處士朱峻勵學能詩避難石浦鎮課徒賊至鎮峻身先鄉民禦賊六鰲山麓力盡被執謾罵不屈遂被害

○儒童喬以熊義民鍾長慶朱兔生胡力揚陳岐陳克昌周大宗周文華陸兆龍並罵賊被害

○義民郁汝楨神童涇人莊天成易涇邨人並遇賊自縊死

○義民朱仲山出區二十畝人流寓陳紹錦餘姚人並遇賊不屈被焚死

○義民朱璿拒賊陣亡又王鳳淇遇賊不屈被害  
○義民周大拒賊陶家橋陣亡王永和拒賊西庫陣亡朱



仁拒賊楊及涇陣亡徐士良黃根良楊茂亦並拒賊陣

亡

○義民朱受珍吳為枋吳光復吳道吳鶴張鳳張琴几王

硯香王效天周達三周之銘許大寶顧傳禮陸金虎並

遇賊不屈被害以上並元年五月殉難

○監生王樹愷易涇邨人賊竄邨樹愷持械擊賊力盡被

殺庠生胡燦衡遇賊投河死

○義民陳兆溶顧之旭並罵賊被害陳萬隆沈茂並茜墩

人遇賊不屈被害

○義民胡世基陳梅亭陶文明並蓬閭鎮人趙子才吳家

橋人徐畹蘭陶受並賈家埭人又鍾玻胡廷錫俞炳襄

殷成章殷靜岩孫汝弼曹連城王榮邦湯文彬沈慎齋

朱大朱懋森湯雲溪周卿和周慰全任從枚陸鐘秀流

寓葛步瀛吳縣人並遇賊投河死以上並元年六月殉難

○監生候選州同馬兆熊監生陳德基遇賊被擄絕食死

流寓夏金鑑青浦庠生居崑邑歇馬橋鎮家塾授徒素性嚴

毅不阿賊至鎮焚掠遇賊罵不屈被害

○監生周小江遇賊李區十旨拒賊陣亡張鴻遇賊被焚

死俞士芳遇賊投河死武生葛逢申遇賊不屈被害

○儒童王德輝遇賊被執奪刀手刃三賊遇害

○義民葉敦赴車塘橋港口收埋被害尸首遇賊不屈死

倪永和王萬岡王德淮王遵福金康安並遇賊不屈被

害



害

○義民王三陶家橋人遇賊拒敵陣亡金茂園西北鄉人擊賊被害以上並元年七月殉難

○朱鏞己未恩科壽榜副貢世居崑邑東南鄉耆年力學植品端方賊至鄉罵賊被害年八十餘監生張宗瀚戴潭邨人賊掠至邨宗瀚適病篤遂自盡

○義民吳贊先楊虎遇賊絕食死周惠宗沈世煌並遇賊絕食死錢一桂桂一作桂大市鎮人胡二匠人港人楊宜生

大斛浦人王達璋王二並陳墓涇人陳元坤戴恩祺流寓郭秉誠一作秉乘紹興人並遇賊絕食死

○庠生龔逢辰世居茜墩鎮增生雲瑞子賊大隊至鎮暴肆焚掠逢辰被執縛脅以降大罵不屈賊縱火於其居被焚死子亦寬被戕死

○儒童許少筠義民鄒福增許賜福吳杏鳳一作鳳並遇賊投河死

○庠生張鳳翔罵賊被害監生葉如璠賊竄茜墩鎮誓不見賊投河死

○義民戴伯和賊竄石浦鎮被執不屈鞭之垂斃伯和曰吾年幼死得其所可無愧先人但不願死於賊巢耳乘間逃歸甫抵家即死採昭忠錄傳

○義民許虎陸錦芳並施料邨人管學海橫涇邨人並遇賊不屈榜掠死陳大信陳二信張金寶許竹書陸元吉



並遇賊不屈被害

○義民蔣三青浦人爲崑界小田圩湯氏傭工賊大隊過境沿鄉剽掠三率眾拒鬪力盡被殺死後面如生拒賊器械尤執諸手

昭忠錄有傳。以上並元年八月殉難。

○庠生陸雲楣原名鳳梧字介甫賊大股至鎮焚掠雲楣適臥病子仁煥侍於家賊突入其室雲楣厲聲罵不絕被斬數刀而死年四十七仁煥被擄不屈死年十有一雲楣長兄雲標同時殉難別有傳

○徐瑛原名玉瑛字國瑞居安亭鎮幼穎慧工篆隸善屬文補府學生少失怙事母以孝稱兄弟間亦友愛無間賊擾及鎮瑛端坐于家罵賊不絕口遂被害年六十三

○庠生張伯年王元熙李標顧元標監生俞硯堂陳逢辰張洪仁顧行鈺武生周演遇賊並不屈被害

○庠生王程望字雪齋素優品學遇賊不屈投河死從九品銜顧沅遇賊自盡監生鄒廷楨呂區十二畝人賊竄西鄉卽赴水自盡

○庠生陳周泰茜墩鎮人賊至鎮焚掠泰謂二子吾等讀書明理安可見屈於賊貽先人辱遂與二子大偕二偕同日殉難

○庠生范茂松姚承瑩並茜墩鎮人自幼同塾讀書少長同社論文訂莫逆交賊竄各鄉焚掠將近鎮二人誓不見賊絕食死庠生祁大生亦茜墩人家貧課徒自給傲



衣百衲處之泰然其襟懷曠達如此賊至鎮被執不屈自刎死

○監生陸家讓陸壽春遇賊被焚死監生喬熙泰蓬閭鎮人年七十有七賊竄至鎮遇賊不屈被戕死庠生杜光表遇賊西南鄉紫涇不屈被害

○奉祀生曹如儀孝子曹士元曾孫年近七旬居南星瀆鎮授徒賊至鎮拽之行如儀指賊罵曰我孝子後裔安肯與叛逆為伍賊脅以刑罵益厲鞭扑無完膚遂遇害

昭忠錄有傳

○夏啟元議敘從九品賊掠西鄉毛巷邨被執偏受偽職令代徵糧啟元數其辜而罵之曰我不能殺賊為汝賊

所執惟一死耳賊大怒鞭扑刀鋸雜下遍體幾無完膚罵益厲賊怒甚積薪四圍而焚之猶罵不絕同時被擄

逸歸者述其事

昭忠錄有傳

○庠生陳兆濂陳兆奎並遇賊葦葭浜被執不屈同被殺

○僑生張瑞良雲區十六畝人村塾教徒餽口妻周年並六十賊竄畝中夫婦被執大罵不絕口賊並殺之

並見義烈

○監生俞文藻同子庠生慶芝文童許容保並遇賊不屈被害

○文童晉思潮

廩生晉邦基子

遇賊不屈絕食死顧惟森朱與楮

並遇賊不屈被害義民陳梅卿張虎並劍區八畝人遇

賊自縊死



○處士鄒燿字鎔成崑西鄉孟子浜人賊大掠西鄉燿急命家人具舟避難舟行二里許遇賊蜂至燿奮身躍入湖次子大均一作均殿陞陞一作陞隨入水同死大均妻殿陞妻同殉見義烈

○義民江錦濤吳鳴球湯玉成湯祖並戈家港人張茂方沈逸雲並馮家壩人楊國慶高田浜人王承蔭沈鳳元陸以鏞陸嘉漪並陳墓鎮人賊肆掠東西南三鄉並遇賊被焚死

○義民龔受玉程學陸萬昌並歲區七畝人鄒孝思鄒德昌鄒六沈弟朱允和楊和觀張維周王壽昌蔡錦榮謝錦榮並呂區十二畝人鄒景華鄒濟堂金庭謝顯文徐

應山徐義常並呂區十四畝人陳鳴玉陳振玉吳發齡並調區三十九畝人朱銀和繆再福繆正玉錢通楊鳴山強正方郭孝本並雲區十六畝人張毛金文秀陸兆隆陸二陸七莫吟梅湯炳文湯八湯木湯龍並歲區十畝人張培綱張竹廷吳秀玉姜廷錫王木韓啟祥並歲區十一畝人張銀龍張國華湯三邱宗泰鄒四寶杜昌宗杜洪樓沈維翰沈洪元沈三茂沈大沈二陸和沈鳳山杜大均杜葆田杜權徐南昀沈南雲湯啟良湯玉祥韓啟揚並歲區三十八畝人王耀祥王耀先郭鳳祥陸男度陸金蟾並調區十五畝人朱崑玉邵二寶劉顯張三元並昆區二十四畝人朱成章金德章范耀祥沈惠



祖並陽區四十畝人沈二官徐雲飛並成區五畝人湯毓秀王懷並律區六畝人王春泉陶家橋人又馮舒安柴鳳標陳松年陳桂堂陳泰安陶寶張德基張起濤王世錞周大本郭專義徐敬祖同子徐大周福源一作錢榮存葉光旭陳克明陳兆燿馮恭曾龔大諸天福朱榮楨陳型陳文寶陳瑞章陳萬學楊蘇韓大錢炳南錢景工姚虎姚大楊柏壽張鈞張增齡張錦松張秋田王效文莊大麟莊家堡黃泗黃學泗黃涵哉湯義民汪煥若周子平任裕海沈克勤范景良顧萼溪顧椿陸聿瑞陸文枝陸文桂陸似松陸檣葉秋霞吳家駿周元章邵建江陸憲章均未詳其里居又陳樹生陳秀章陳汝諧陸

肇咸孫宗達孫廷鑑並陳墓鎮人鍾古楮尙明殿人何應初團池港人湯潔甫沙浜人周鳳梧陸茅元明邨人顧漢章顧應蘭陳錦堂曹和曹家本並霜區十一畝人陸麟趾燈下邨人蔡德茂湯墩人又流寓張成基李宛卿並習鍊業無錫人吳文炳一作炳文賊匪大隊竄擾東西南三鄉邨莊僻處靡不搜掠各鄉居民流離遁避歷半月有餘民船在大市鎮雙洋潭河被賊劫掠者傳稱數百餘號被賊戕死投河死及全家殉難死者雙洋河濱屍相枕藉是月之死於難者不可枚舉僅就報列忠義案者錄之

○義耆馬兆泉一作紹泉年八十三馬士良年八十一馬天成



年六十並趙陵邨人同時拒賊斃賊多名並中鎗死

○義民馮毛朱殿珍何應楚楊鶴山楊靜遠一作張大黃

耕良一作廣良凌和周秀章周二周尚賓陸耀芳並遇賊雙

洋潭陣亡

○布衣吳淞字可園住岡區二圖元年九月遇賊楊及涇

罵不屈賊割其耳罵益厲投河被賊持竿刺死

○義民周亦耕喬亦嚴湯芝泉嚴紹宗同子四官支南橋俞慶

堂俞逢甲俞逢丙俞逢庚俞慶王俞太原俞善根俞大

椿柴立棟姚朗泉並遇賊不屈被害以上並元年九月殉難

○義民徐子法張家埭人賊至子法臥病不起賊給之食

子法怒罵不食死鄒運祥同時遇賊絕食死潘茂章蔣

墩鎮人遇賊絕食死

○監生陸沈陶璣金德昭並罵賊被害

○義民陸二守艇船遇賊投河死義民宋甫棠羽士包星

如同時遇賊並投河死以上並元年十月殉難

○義民孫明德包世昌並蓬閭鎮人罵賊被害顧崑玉范

琛范琦同時並遇賊不屈被害吳仁金吳定榮張金福

王元德戴雙和包雲衢並罵賊被害孫琴史遇賊絕食

死俞孝宗拒賊被害以上並元年十一月殉難

○義民陳藹生雲區十六畝人遇賊被執令服役不從被

殺又王憲卿凌竹峰遇賊並投河死以上二年正月殉難

○監生金厚基賊竄洋城河地方厚基被執不屈乘間投



河死從九品銜陳重慶舉人景崧子遇賊不屈投河死

○沈煒安徽試用縣丞在甯國府率眾與賊巷戰力盡陣

亡家丁張同隨殉

○義民朱崑元陳有恆一作孫友傳金虎說二王鴻年胡

大陳冠三錢杖顧孝思顧維岱吳德成並遇賊不屈被

害

○義童陳暄方元亨秦步蟾並遇賊不屈被害義民吳芳

蔭吳春山並石浦鎮人亦遇賊不屈絕食死

○義民朱史富唐鳴沈玉並石浦鎮人遇賊投河死陳淦

田陳漢田並西鄉人遇賊投河死羽士邵永昌遇賊偏

授偽職不從投河死義民王沛霖遇賊不屈投河死流

寓李春元甯波人遇賊被害以上並二年二月殉難

○奉祀生任如松義民張洪禮張洪智張洪信並遇賊不

屈絕食死又任觀水張義亭吳式汪著並遇賊不屈脅

以降罵賊被戕死以上八名殉難年月無致○右俱忠義案題郵

○義耆包鳴臯年七十餘張浦人十年四月城陷日罵賊

被害王晉臣任城中施衙城陷日遇賊罵不絕被戕時

年七十三

○義耆王士標年八十城陷日被焚死義民陳振柏同時

被戕東城外白堽前

○文童杜阿弟庠生學海子支二麻子庠生國模姪並城

陷日遇賊不屈被害



○奉祀生衛麟福文節公裔孫年二十四城陷日遇賊拒  
鬪被害

○義民胡哲甫城陷自崑城避難張浦遇賊被執不屈投  
河死

○羽士徐茂海張雲亭城陷後並由崑避難張浦五月朔  
賊至鎮同被擄罵不從茂海被開膛鬻割死雲亭亟投  
水死

○義民許萬周和尚毛瑞並崑區八畝人十年五月遇賊  
被擄殺死

○王德翰字嶽伯號崧甫附貢生候選訓導兆鼇長子幼  
穎慧讀書過目不忘有神童之目未冠補邑諸生十年

七月隨父避難僻鄉適祖母顧病革父及弟妹俱病德  
翰措置醫藥烈日往來遇賊追亟罵不絕口奮身渡敵  
側木橋賊隨之橋圯而溺被賊以竹篙刺傷賊退邨人  
救起逾日因傷死時年二十二

○庠生張柏字松卿文童陸本誠字曲甫並茜墩鎮人十  
年八月六日賊至鎮被擄柏罵賊投河死本誠不屈遇  
害

○監生范永錦邑東南鄉人十年賊陷城後至各鄉焚掠  
八月永錦聞賊至即自盡妻隨殉

○義民賈五官昆區二十二畝人徐海張灝崑城人十一  
年五月遇賊被害陸傳香張浦人同時遇賊不屈攜女



投水死

○義民方旭林避難蓬閩鎮十一年九月遇賊被執不屈賊憤鞭笞死

○義士朱世攀字桂芳家貧性耿介庚申城陷後誓不與賊同處至十一年賊勢益張杜門不出絕食死

○監生陸彥珍住菜區四畝性誠懇屢創里中善舉庚申聞城陷絕粒死臨死大聲呼殺賊年六十八義士傅汝浚菜區一畝人十一年四月遇賊不屈被戕又庠生傅仁麟議叙職銜傅慶璠並菜區人元年四月遇賊不屈仁麟投河死慶璠絕食死嘉定庠生倪懋廷遷居菜區四畝元年遇賊罵不絕中鎗死義士陸育元葉順天曹

芳陸近圃同弟榮吉錦章瑞廷並菜區人元年四月遇賊不屈同殉難

○監生王宏基闕區二畝人元年四月遇賊被執不屈被賊斫死義民陶茂德金海李傳並闕區人遇賊不屈陶金並被戕死李投河死僧人志修住持闕區三畝萬壽庵元年十月朔見賊大至兀坐淨室賊毀門入大罵被戕死

○文童朱學成庠生大椿之長子德成大椿第三子元年四月學成遇賊曳之行罵不從投石碎賊首賊恚甚鬻割學成破其膛時年十有八德成年十四同時夏駕橋遇賊賊知爲書生誘以重用厲罵不從被害



○義民錢思順鄒思順闕區二畮人金竹谿張星並闕區  
五畮人元年四月錢鄒遇賊被執絕食死竹谿遇賊大  
罵賊釘竹谿於門持刀刺胸死張星亦戕死又錢錦安  
亦闕區五畮人同時見賊磨至左手持鑊蓋石手持菜  
刀大呼殺賊被執斫頸幾斷死

○義民陳坤陳沛陳寶生王春並昆區八畮人元年四月  
拒賊被害

○義民曹素安花家橋人訓蒙爲業年六十餘元年四月  
賊竄至鎮閉戶衣冠端坐賊見叱爲妖斬死又賴振方  
同子雲岩並習醫同時遇賊方泰鎮被拘不屈並被戕  
○義士汪國治國鼎住場及涇庠牛鳴鳳之子元年四月

遇賊被擄自盡

○義民羅日耕羅小亭吳萬千並菜區五畮人元年四月  
遇賊被戕

○羽士黃宏坤住菜區五畮新菴狀貌奇偉髯長過腹賊  
疑之向索金刀笞雜下體無完膚死元年五月事

○義民王法觀麗區八畮人陸裕峯吳金和尚並下段邨  
人陳毛觀生區七畮人元年五月同禦賊中鎗死

○義民潘載昌元年五月遇賊投水死許履泰同時遇賊  
於陸家橋脅從不屈被戕子定邦投水死夏天秩同時  
遇賊塢漚不屈投水死周七官同姪星華元年七月遇  
賊被擄不屈赴水死並昆區二十二畮人



○義民張泉源住菜區南三畝元年八月遇賊被擄拒鬪力盡投水死又陳松筠住茜墩鎮同時被賊擄投水死

○義民張金榮南三畝人元年八月拒賊中鎗投河死地區五畝人陸芝山九月落霞浦遇賊被害

○義士李德鄰嘉慶辛酉選貢以鼎孫元年八月遇賊被擄至城賊令服役大罵不屈被斬死棄城中市河

○庠生李德演字合山世居茜墩鎮幼穎悟有神童之目三歲能識室中楹聯芝蘭千載美琴瑟百年和之句授讀後日成誦百行年舞勺遊庠冠一軍性狷介嚴義利辨家貧久館大直邨戴氏同治元年九月賊大掠鄉邨鄉民紛紛遁避德演以貧困不能避斷炊數日雖親友

不肯致乞米書鄰農某知其介乘德演外出裹糧斗餘贈其家德演歸詢婦曰米何來婦以實告德演頓足曰今遍地賊蹤我家人父子以同殉爲無遺憾甘受此非義魄以苟延於世乎語訖攜糧歸鄰農同繼妻蔡氏絕粒而死子傳立流離死

○附監生候選縣丞陸雲標字冠林號嘯霞世居邑西鄉陳墓鎮自幼力學屢躋秋闈試棄舉業習申韓之學歷遊幕蘇松常鎮當事爭延致素性嚴毅不阿咸豐庚申粵逆陷城後雲標居鎮倡練民團賊竄至鄰鎮舟直雲標率團勇往禦受重傷歸鎮中從賊者議貢賦於賊力止之不得爲賊徵糧勒派戶捐雲標獨不應致銜怨被



毆幾斃命復指雲標違禁薙髮令百計恐嚇終不屈賊門匿跡同治元年赴章練塘官軍獻進勦計以母憂歸里是年九月賊大隊擾鎮雲標遇賊罵不屈遂被害弟雲楣同時殉難別有傳

○庠生張詩鑑元年十月遇賊刁蒲邨不屈受傷死

○義士王亭芳周家浜人二年正月遇賊大罵被斫十餘刀而死

○義民包錫爵王荷薊林闕區五畝人二年正月遇賊罵不屈錫爵被害荷薊被脯醢其妻均隨殉見義烈

○義民韓蘭邨同子壽全二年春遇賊被擄殺死葉庚官昆區二十四畝人同時遇賊投水死

○葛居易字占五綸裔孫五世祖永思讀書震川書院遂居安亭鎮補嘉定諸生父葆孫勵品行爲鄉里推重居易自幼敦內行力學補崑邑諸生講求韜略咸豐庚申四月粵匪陷郡邑旋犯安亭鎮居易負父奔走江鄉屢絕糧脫衣易粟以食其父已食生桃逾年投上海軍營敘績以直州牧銓選同治二年積勞歿於軍

右俱未旌

以上崑山

○李傳鉞字左黃國學生議敘縣丞德郊次子德郊督諸子課極嚴傳鉞獨不喜經生家言慷慨負大志道光己酉大水在吳江令姚某署襄理荒政以勞得議敘咸豐庚申春粵匪東竄逼省垣與邑中紳士辦巡防事四月



二十六日城陷團勇潰散傳越獨不去遇賊騎於城東  
街道被執脅令導至富室求金傳鉞佯諾之誘入城東  
新橋街僻處袖出利刃刺中賊賊頓仆地傳鉞執刃退  
出又遇數賊厲聲罵殺賊被數賊鬻割而死有老鄰陳  
還者與傳鉞素相善同陷城中勸其死深夜移其屍於  
東新橋旁隙地以瓦礫覆埋之後陳還逸出備述顛末  
得其詳邑人徐家疇撰傳

○庠生金汝杰字梅舟父逢辰諸生 恩錫耆員世居城  
中天區三畝集街汝杰植品端方家貧援徒以先行後  
文爲勛子慶嵩字仰甫廩膳生性孝友咸豐庚申賊氛  
逼汝杰年七十有五預遣眷屬避寇南鄉王家邨慶嵩

侍父於家汝杰命之去曰吾當殉節慶嵩願同殉城陷  
日汝杰衣冠坐堂上慶嵩侍右賊毀門入叱爲妖汝杰  
罵賊賊殺之曳慶嵩見其酋知爲讀書人欲重用之不  
可旋令導覓富室慶嵩誘人叢莽中袖出廚刀斫賊不  
中被賊鬻割死時友人顧文齋被擄親見之逸出述其  
事汝杰媳女隨殉別見義烈傳 同治十年夏攝新陽縣事陳  
其元樹坊表其里顏曰成仁里昭忠錄父子合傳  
○庠生張煒原名萃升遇賊罵不屈被害庠生錢龍杓遇  
賊王潭村不屈被害監生季靜柏罵賊被害  
○庠生陸用舟自縊死武生議敘千總楊江率勇拒賊東  
鄉受傷死



○庠生葛熊飛遇賊不屈被害文童汪兆鼎顧小笠並自盡死孫湘孫廷通張福澤並罵賊被害

○處士吳省三世居城中果老術讀書通大義家赤貧終身未娶性尤孝啜菽飲水奉母能盡歡寇氛近逼預命其姪挈家避於鄉曰我一布衣耳必為清白民正邱首死足矣不可見辱於逆賊城陷日省三端坐堂上自盡

死昭忠錄有傳

○義民吳旭升孫載賢並遇賊不屈投河死沈小弟投井死陳大郎自盡死徐惠莪不食死

○義民徐若林陳信姚侶姚履豐何魁張昌林王景曾汪善夫金必達嚴秀顧廷魁顧受百一作壽百薛家芝薛增朱

裕如吳萬明錢錫麟查龍沈振岡並遇賊不屈被害胡瑞昌城陷日拒賊被戕李子香一作襄趙繼雲並投河死

以上並咸豐十年四月二十六日城陷殉難

○庠生錢本選字春生居正義之雅涇里素善書得思翁法兼工畫竹家中落以授徒餬口賊至鄉本選懼見辱與妻同赴水死子崑庠生廷衡城陷後即被擄不屈旋

聞父母殉難投河死昭忠錄本選有傳

○義僕錢德章西橫涇人幼鬻正義鎮趙氏樸誠謹飭庚申之難隨趙主避寇徒步相從賊至鄉肆掠主僕流離忽相失德章直入賊巢尋其主被戕死逾六日賊退主得其屍斂之顏如生時年六十



○唐張煜字煥齋道光丙午科副貢秉性誠懇靜默寡言  
工制藝家塾授徒講解必洞徹入微孜孜不倦從游者  
聞風而至立文社督課塾徒甚嚴逢學使歲課試門下  
士獲雋者居其半心尤慈好戒殺捨生里中惜字濟貧  
諸善舉不辭仔肩十年四月粵匪將至張煜奉母避於  
鄉聞城陷不食數日自盡死

○增生潘裕容庠生朱炳曾並遇賊不屈投河死庠生潘  
陽谷拒賊舟直鎮被害庠生陳均汪軫並罵賊被害

○武生沈錦彪一作金彪父雲鳳賊氛逼近錦彪隨父糾集義

勇嚴防堵城陷後防益力團勇有二千餘人五月八日  
禦賊白塢之北雲鳳受傷退錦彪率團突陣斃賊無算

直薄東城下賊大隊出敵錦彪力盡陣亡團勇張啟堃  
孫鳳階朱小慶李景山李介榮石勝才石大同歿於陣

雲鳳以傷死錦彪妻自盡詳義烈昭忠錄雲鳳  
錦彪合傳

○武生吳冠英六品軍功吳恩錫並拒賊陣亡

○崑新城守營外委陳紳金陵人城陷時統兵不滿隊數  
拒賊守備署前失利隨把總許退守巴城斜堰交界招

集鄉民並會常昭兩邑團民抵禦賊眾紳身先奮擊賊  
入城正擬攻城為克復計賊眾四出夾戰絕紳後援力

盡陣亡邑人杜鴻緒有詩哀之其營兵鬪死城內者徐  
雲飛陳亮殷鳳山周克明四人其鄉民隨紳陣亡者朱

養元朱修和吳鳳俞奎映劉初山陳斗朱金林戴炳華



等八人有團勇陳土者巴城人素有勇力隨同拒戰斃賊無數被賊生擒不屈賊殺之破其脰懸於樹而去猶聞土呼母聲其兄某負回家始氣絕又營兵團勇徐正邱玉泉饒飽阿七亦陣亡

○義民王錦堂家新塘邨遠近鄉鎮各集義勇拒賊錦雲守於家賊入其室索銀錦雲大言曉之曰汝等大率本良民朝廷何負於汝汝等敢助賊爲虐造此大孽乎繼以厲聲謾罵被賊刺殺之又莫商昭忠表素無賴同時執兵擊賊隔賊一水之遙以長矛傷賊多名被賊發檀鎗中額俛仆賊斬其首而去昭忠錄王莫合傳

○義童陳國鏢率團拒賊大直邨陣亡湯煥同時遇賊不

屈受傷死

○義民錢朝杰住朱涇邨邨民鳩眾拒賊朝杰與焉戰敗被賊擒使掉舟不從厲聲謾罵曰我方欲殲此畜類今力盡被執惟一死耳言訖赴水賊大憤以鎗亂刺而死時義民錢存芳昭忠表地保閔賡良同拒賊亦死昭忠錄朝杰有傳

○義民沈茂和邵季華年並六十有五杜橋邨人聞城陷集鄉里健兒各持農器屢次拒賊擊退十年五月六七兩日禦賊於杜橋邨茂和率眾力鬪死季華被伏寇執縛置屋焚死其孫大德同焚死隨茂和季華拒賊死者孫耀曾孫克成吳六福張曉堂張裕成韓耀昆孟榮朱



與齡孫客人沈廷芳夏子福沈裁縫孫奎元王裕遠孫  
 燦章朱二徐大福沈二韓耀珍錢惟善管洪道朱四福  
 孫介福顧蔭山俞永茂王錫福王榮齋龔增福孟連馬  
 銀福周龍吳福祚張大一作共三十餘人惟徐大福被  
 害尤慘昭忠錄沈

○義民陳曰順朱家灣人素嫻鳥鎗十年五月八日邑之  
 南北鄉民起義攻城曰順糾邨眾為鳥鎗隊各執鎗擊  
 賊賊在東關外越河橋接戰曰順等鏖戰良久殺賊墮  
 水者無算賊退入城曰順等乘勝蟬聯而進自北直薄  
 城下嗣悍賊成羣持兵出城戰各裸其下體曰順力盡  
 歿於陣從曰順陣亡者不能盡攷可攷者惟朱虎朱四

龍朱還而已

曰順昭忠錄有傳

○義民蔣國賢十年五月八日鳩眾攻城戰敗國賢殿為  
 賊追擒支解之並剖其腹刳其腸是役之死於陣者南  
 北鄉民不下數百人鄉民自北來者多死於夾潮塘自  
 南來者多死於致和塘南北鄉死難不得其姓名者多  
 其載列昭忠表從國賢死者徐克明朱慶陳和陳元張  
 錦堂王大王二李大浦和傅三一作阿元一作繆大應祥陸祥陸  
 二寶十三人昭忠錄國賢有傳

○義民徐福林住黃墩邨家務農素性放浪耽博狀貌奇  
 偉遇不平事輒力爭之邨人以其憚福林邑城陷四鄉  
 土匪蠶起福林與邨眾集義團至五月十日賊大至圍



明邨欲渡清洋江東去福林鳴鑼眾集青浦官兵礮船亦至兵民不下萬餘人環聚與賊戰福林復率嵇四元等十一人渡江殺賊誓復城垣而返直抵圓明邨賊壘擊殺賊數十名賊頓失色大言曰我等至省城東下官兵無不聞風披靡今一田舍子迺有如此膽力當以大將軍目之鏖戰竟日福林敗歿於陣嵇四元等並死於江賊斬福林足投諸江連呼還爾大將軍越數日鄉人過邨見福林屍首顏色如生理之時年三十有三昭忠錄徐福林傳從福林陣亡嵇四元等十一人查昭忠表祇載嵇四元朱瑞福張大劉金和四人

○義民朱靜遠朱家灣人年十八十年五月八日灣中人攷城者以數百計靜遠隨其叔俱往身先突陣戰失利

脫身歸行至南塘橋橋撤不得渡賊騎追至靜遠同眾俱入水死於水者數十人惟靜遠得其屍從靜遠死可攷者俞大經陳敘來陳啟祥陶玉成高長綆一作綆清唐曰華嚴秀和董啟祥陳金榮蔣金官又與靜遠糾眾攻城莊涇邨陳玉祺被賊擒斬醢其屍昭忠錄靜遠有傳

○義民沈孝一作思孝徐懋功昭忠表誤沈姓一作徐金年並六十餘同在思巷邨率眾拒賊孝與懋功各執魚叉接背而行併力殺賊多名力盡同陣亡被賊醢之又陳友梧拒賊舟直鎮陣亡地保朱小遇賊鬪死羽士陸二拒賊青洋江手刃數賊追至東門外力盡陣亡

○義民周竹亭浦廷祥並遇賊自縊死流寓王某人揚州自



縊死

○義民朱廷珍唐大並長洲人廷珍久居新邑之侯涇佃田爲業十年五月八日鄉民起義攻城廷珍因年老不隨陣惟手執一棍曰如賊敗退出以棍擊之及眾敗爲賊所殺唐大自幼傭工北鄉陸氏年二十餘十月五月十二日常昭兩邑白巾勇來攻城大奮身協助勦賊及敗爲賊所擒以槍洞其腹腸迸流棄諸水翌日屍浮出其主陸姓收斂之昭忠錄並有傳

○義民時亮才徐李鏞謝二官並罵賊被害

○義民歸福林陳鍾俊王興甫方靜山湯金和周二周三周財德並遇賊投河死

○義士趙祖培號庭樞善棋曲彈詞遇賊正義鎮與子世琪投河殉難幼女被擄自盡事載烈女傳

○義民徐老榮孫某李家榮魏金和孟三觀並遇賊不屈被害馮大寶遇賊投水死

○義民周雙隆雙喜雙福張錦芳錦昌錦洲並廟墩人賊至鎮周張兩姓遇賊不屈全家殉難金上達並子煥成

成一孫榮春遇賊被害

○王立山充正義鎮汎地兵平日鋤強扶弱有古俠士風尤以忠義自期許十年夏賊氛逼家人議遠遁立山曰我身隸行伍當知上馬殺賊禦患捐軀馬革裹尸意中事耳臨難偷生又何顏立人世乎賊至鎮驅子女及外



孫同赴水遂自刎闔門死於難昭忠錄有傳 以上並十年五月殉難

○庠生姚春煦遇賊不屈被害義童陸松溪同時罵賊被害

○義士趙衢亨住正義鎮舉人文彬孫庠生之駿子幼讀

穎異弱冠孤棄學習拳技賊至巴城鎮衢亨隨常昭崑新義勇拒鬪始交綏得勝旋因火藥船災眾奔散約期

再戰賊乘隙奮勇而來衢亨被戕身首異處事平得尸未歸其元年二十九

○義民王世龍陸克昌石振玉秦木潘仲山並遇賊不屈被害王土王子問問一作文張七拒賊巴城鎮陣亡徐維林

拒賊石牌鎮陣亡

○義民徐七常州人寄居新陽城陷充巴城鎮團勇賊至

拒戰身被重傷猶手刃數賊賊環執之臠割而死昭忠錄有傳

○儒童吳厚成字德甫年十七母病危焚香告天割腕和藥進母食即愈隨父避難厚成負祖母行至十餘里脫

後追尋父踪不得遇賊被擒不屈投水死時年二十一以上並十年六月殉難

○歲貢生就職訓導胡樹蘭庠生薛樹筠並遇賊不屈絕食死庠生朱承祖遇賊投河死以上並十年七月殉難

○儒童潘斯美以能書稱年十九父病危禱天以身代割股和藥進父食父病尋愈遇賊不屈絕食死流寓談子



敬向容遇賊被害以上並十年八月殉難

○儒童徐李亨素善畫庚申避難古鏡子邨賊至鄉被擄不屈厲聲大罵被賊亂砍投水死

○義民徐佩金避難鄉邨困於資斷炊至數日偽鄉官餌以白鏹令司記室力卻之賊至威逼萬端不從執至中途逸出曰四面賊蹤將安適遂絕粒死昭忠錄

○義民顧錫麟遇賊不屈被害盛逸塘遇賊不屈受傷死以上並十年九月殉難

○監生從九品銜周永錫遇賊不屈被害庠生徐森玉遇賊不屈被害

○儒童顧朝選一作兆駿庠生百史子張韻軒並遇賊不屈投河死

○義民姚龍凌煥章並遇賊投箭子浦死張茂官袁伏官遇賊投河死沈明秀薛小倌戴步雲新學門斗並遇賊投河死

○義民車燦文某區二十九畝人年七十有八素敦孝行性好善精武藝與賊戰連日擊殺賊數十名賊麇至又麇戰於夏家橋力盡陣亡血濺四壁上及屋樑神色如初昭忠錄

○義民莫觀玉汪秀徐寶姚亮凌長金天爵並遇賊不屈被害以上並十一年四月殉難

○義民盛家驥遇賊被焚死金德成榜掠死戴三遇賊被執自盡以上並十一年五月殉難



○廩生嚴泰字子谷世居東鄉夜區二十一畝敦內行儀容峻厲不苟言笑後生見而咸憚之尤精制藝歲科試屢居優等同治元年四月賊至鄉泰長子某先為賊所擄泰謂子桐茂松茂柏茂曰吾行年六十平日讀書明大義豈忍偷生於世父子四人誓不受賊辱以同殉為無遺憾桐茂松茂請令柏茂避去以延宗祀不許相隨投瓦浦河闔門殉難昭忠錄有傳

○庠生唐廷耀監生張爾熾武生張鑑瑚並遇賊不屈被戕死

○義民姚心田住北鄉石家浜賊至其邨心田方臥病兄子大官侍側閉門不納厲聲罵賊賊怒燔其廬叔姪俱

成灰燼昭忠錄有傳

○義民項德龍李景文遇賊同執其酋殺之旋被他賊戕

死項隴德賈景山遇賊並被害昭忠錄有傳

○義民孫彥鏞住天區三畝在石浦鎮遇賊大罵不屈被

刃傷同妻子赴水死並見義烈

○義民歸汝桂胡明陳厚堂張恆業嚴允卿陸安祉王小

園並遇賊不屈被害湯濬卿遇賊投河死以上並元年四月殉難

○義民祁和尚拒賊祁家浜力盡被害元年五月殉難

○監生孫儒文同子文童秉厚敦厚載厚遇賊不屈投河

死儒文弟儒忠遇賊不屈被害以上元年六月殉難

○庠生周逢癸遇賊被害監生俞士莪遇賊投河死以上元年



七月  
殉難

○庠生金夢麟罵賊被害文童張備五遇賊被害以上元年八月

難殉

○武生俞洪棟南鄉人賊大掠南鄉遠近鄉民悉逃避洪棟有瞽母不能行以舟載母自掉舟不離母側遇賊劫其舟洪棟倉猝負母登岸舍舟而逃又遇賊叱洪棟舍母脅之去洪棟不從賊以刀斫其足並傷其母洪棟痛憤不已過橋罵賊賊追執之遂被害其母亦死昭忠錄有傳

○庠生莊家堃莊臨監生李道淵顧淦並罵賊被害庠生陸楨遇賊不屈投河死

○庠生陸文照字容光父棟歲貢生積學敦行世居陳墓

文照會軍興負大志講求韜略庚申邑城陷率團防堵里中同治壬戌賊虜至鎮焚掠一空文照被擄至嘉興賊令司筆札不應幽囚之脅以刑仍不屈曰吾至辦一死耳絕粒死年二十九賊相喏曰好男子好男子異其屍瘞之鄰人時姓者被擄逸出述其事

○朱端植原名耀曾號楷亭歲貢主就職訓導孝定先生用純後裔也世居正義鎮之灣塘邨幼稟穎慧成童卽精制藝有熊劉風骨文名振於里肆業郡中紫陽正誼兩書院山長涇縣朱宮贊琦吳縣吳廉訪廷琛見其文目爲雋才無匹廷琛命其子若孫皆師事之屢應鄉闈試不獲售終日耽於飲有時悲憤詠歌罵座以鳴不平



尤善古文詩詞共積二千餘篇稿未刊而燬於兵燹有鶴灣小圃制藝刊行於世晚年兼精醫學行方便不受人酬賊大掠至邨執端植見賊首脅之降端植曰若欲我降取酒令我醉耳賊笑與之飲酒酣耳熱拍案大罵遂被害昭忠錄有傳

○義民施鳳仙戴俊傑郭發廷遇賊不屈並被害錢春軒自縊死以上並元年九月殉難

○監生八品銜朱焯落霞浜人賊入其室搜掠罵賊被執縛鞭笞遍體無完膚罵仍不絕口被戕死賊退家人歸斂之頭顱半絕

○義民張學魁遇賊不屈被害以上並元年十月殉難

○監生沈楚玉遇賊被害庠生孫秉醅遇賊不屈被害

○義民張秀雲戴大孔瑞並遇賊不屈被害

○義民顧瑞升住平莊圩村賊深夜至村瑞升與邨眾十餘人迎擊之連殺數賊旋被賊發鎗受傷賊又折其右肱仆於地瑞升厲聲罵殺賊而死昭忠錄有傳○以上並元年十一月殉難

○庠生王慶元遇賊不屈被害

○義民陸敬材遇賊不屈被害以上並二年正月殉難

○增生顧惟順字厚齋二年二月遇賊被擄不屈大罵投河死增生顧僖字琴軒三月遇賊渡頭村受刃傷投河死從九品銜莊圃遇賊不屈被害

○義民蘇仲美蘇五堂蘇增徐三星並罵賊被害以上並二年



月殉  
難

○庠生周述曾率團拒賊被執不屈遇害

○文童胡在邴遇賊不屈被害羅汝金遇賊自縊死

○義民潘定德率眾拒賊謝堰鎮中礮陣亡徐大潘大李

和尚季品同拒賊謝堰鎮陣亡龔國泰拒賊巴城鎮被

執遇害

○義民蘇啟堂遇賊投河死俞仁和榮壽年並遇賊投河

死

○義民王寶顧銓朱明義姚大趙二季明節並罵賊被害

以上並二年  
三月殉難

○庠生謝燦章率團拒賊東北鄉陣亡

○義民蕭玉衡張瑞和夏進沈大宗徐銀官潘士標曹發

祥顧馥沈學文羽士李道南王士華並遇賊拒敵被害

以上並二年四月殉難  
右俱忠義案題旌

○耆民龔景福業樂工年九十有五居南門外庚申四月

城陷日景福服 恩錫耆員服端坐室中賊至大罵不

絕口被害又王三元河區二十二畝人年七十五城陷

日遇賊被戕義民周瞎子巴城人城陷自經死

○處士唐應泰字運符居蘇城司記室城陷日應泰同女

孫月寶投水殉難

○庠生杜玉煥年七十城陷日遇賊持刀罵殺賊被戕死

庠生邵寶三同日遇賊不屈被害



○義上趙錫頤趙曾熙並居正義鎮業儒聰慧城陷日賊掠及鎮錫頤投河死曾熙被擄不屈飲鴆死

○庠生俞觀光十年城陷避難東鄉腰漚四月杪賊至鄉同子慎旃二官被擄不屈被害妻曹氏同殉

○義民魏志學正義鎮人販負爲業十年四月被擄脅令導覓避難民船志學詭引無船處賊廢然返及偵知民船俱在陽城傀儡河濱受其誣被賊斫死志學自願捐軀保全千萬性命其義勇如此又正義鎮羽士俞宏敷一作洪甫十年五月傀儡河遇賊被害身首異處

○義民王大雲正義鎮人十年四月在城遇賊不屈被害其子某年幼知父死於難號泣不已絕食死兄大章被

擄死母葛氏年七十亦遇賊受傷死

○監生陳佩華原名椿年住落霞浜習世傳醫術頗行世  
庚申四月避居北鄉遇賊全家被擄罵賊不屈闔家殉難

○義民龔閻亭正義鎮人素持勇力賊至則獨力拒鬪數斃賊十年五月被賊斬死又高信忠張宗元並正義鎮人同時遇賊投河死

○文童錢廷珍原名先觀幼穎悟年舞勺卽工時藝名噪文壇庚申五月遇賊投水死

○義民殷客人販木爲業上元縣人寓金茅邨庚申五月從徐福林義師攻城歿於陣



○義民沈巧元高大沈金觀並古塘人高如桐翁雅三並正義鎮人蔡大觀朱大觀崑城人庚申五月十二日賊大掠鄉邨居民舟入傀儡河避難帆檣銜接賊流河濱劫掠民舟倉猝投河殉難者不下千餘人就可攷者錄之

○義民周在德翁智斌翁智榮並正義鎮人十年五月並遇賊被擄在德投水死智斌智榮被戕死陸某陶瑞庭並北鄉盛涇人同時遇賊新塘橋鏖戰竟日力盡陣亡陸某斬首開膛

○義民王孝先范錦香范豫孫順昌孫襄皇甫慶皇甫星並寒區人徐惠徐家邨人龔大明郭家港人包子福包

家橋人陸全同子增福支家莊人十年五月並遇賊拒敵被戕

○義民王妥觀暑區十畝人十年五月隨巴城團勇拒賊力盡被擒開膛死殷某吳某並更樓橋人朱瑞郁太平河人同時遇賊被擄俱殺死

○義民高冠卿素有膂力束城外後羅邨人城陷鳩鄉民悍勇數十人誓同殺賊賊至鳴金以集屢獲勝六月四日賊復至冠卿身先出鬪賊環攻執之被賊鬻割而死

○候選縣丞李清標十年七月遇賊被擄不屈死  
○義民高森林岡戴國棟朱五寶徐德張法倫同子慶堂並藏區十二圖人十年八月遇賊不屈同被害邱愛亭



同時遇賊投河死

○義民顧發東顧巷人十年九月遇賊被擄罵不從賊怒削其面罵益厲至割舌剖胸而死年三十五

○李傳嶠字唐山德郊第六子髫齡失怙恃穎慧邁人汎覽經史過目不忘未冠補諸生卓犖有大志庚申春應科試冠優等得餼於庠四月粵逆竄崑知仲兄傳鉞守城殉節號泣月餘逆匪嚴蓄髮令傳嶠堅志不從隨南鄉團勇拒賊義形於色旋潰散憂憤成疾伏枕寤寐間時大聲呼殺賊旋以絕粒死年二十二

○方兆沆號荔汀國學生浙江候補府經歷署常山縣巡檢十一年冬奉調衢州府城督兵防堵十一月遇賊衢

州西城外陣亡

○義民杜永福龍涇邨人十一年春遇賊大罵被擒斬死又姜蓮溪崑城人避難北鄉是年九月遇賊陽城河被擄不屈遇害其妻同殉又許允香住來區八畝是年十一月遇賊鬪死又張受益張耀高並芥區十一畝人元年五月朔遇賊被擄不屈同殉難

○張熙積字式甫十一年春遇賊周市鎮不屈被戕死

○耆民呂玉成月區二十八畝人業農遇築圩脩橋諸善舉必贊成完固意所不可面訶無少假過卽望遠近咸推重之元年遇賊不屈被刺喉而死時年七十有餘羽士夏俊賢盛涇人拒賊中洋斃死



義民徐還徐土徐本徐二徐小住南黃邨元年四月賊至邨兄弟五人羣起拒敵力盡被害

○義民李澗泉張和尚並藏區十二畝人元年三月遇賊不屈同被害李萬宗唐家邨人楊龍官錢家塢邨人徐景山外河涇人元年夏萬宗龍官拒賊並中鎗子死景山十一月罵賊被害又徐復禮同時遇賊巴城鎮投水死

○義民孫秀章同子海官虎官陳瑞同子本官近官並落霞浜人元年四月持械拒賊被害

○王景麟字德符庠生作霖第三子自幼穎慧過人弱冠游庠卽通六經易義壽陽相國祁視學吳中得景麟試卷精浚長之學以首拔餼於庠自是歲科試冠軍者數七名益噪從游門下士數十人課嚴化速屢躋秋闈試積餼貢成均後援例授國子監學正因事牽累禠職歸里遭粵逆之變感事情時至元年五月絕粒卒年四十八所著正史辨明季殉難錄補遺均未付梓律賦制藝間選刻

○監生議敘八品銜徐熾住巴城鎮元年九月遇賊大罵被害時年六十一義士胡耀廷同時遇賊不屈投河死  
○義民唐承盛年七十有餘列區四十七畝人同治元年秋遇賊至鄉同子茂鳴金糾眾殺賊數月後賊復至擒承盛父子鬻割而死



○文章未祿增成熙長子元年春隨祖母及父母避難赴  
滬遇賊南翔鎮大隊擄掠祿增為祖母父母求免遂被  
擄去後據同邑人賊中逃出述見祿增在賊匪中思親  
不置憤鬱而卒時年十六

○義民王榮堂寒區人二年三月遇賊被害又義僕毛積  
福正義鎮趙氏傭工頗忠事其主同時遇賊不屈被賊  
砍首死

○義民孫韞甫二年三月在石牌鎮遇賊厲罵不屈被賊  
斬首懸諸橋畔年三十一其妻同殉見義烈

○義民張受之收區二十畝人二年四月遇賊被害陳章  
巴城鎮人同時遇賊中巷橋拾磚石投賊被賊鎗刺死

○義民張廷嚴家灣人二年四月遇賊大浜渡奮勇擊斃  
數賊力竭被戕顧昌旻區三十五畝人時官軍克復邑  
城賊竄鄉拒鬪被害右俱未旌  
以上新陽



崑新兩縣續修合志卷二十八終



